


ル 5
3285
6



凡 5
3285
卷 6

重刊宜興縣舊志卷之八

人物

忠義

晉

周處

明

盧象昇

堵允錫

以上特傳

漢

蔣澄蔣默

吳

重刊宜興縣舊志

重刊宜興縣舊志 卷八

昭和十八年
八月十八日
購求

周 魴

晉

周 玘

周 筵

錢 廣

齊

周 山圖

周 盤龍

梁

陳慶之

魚天愍

陳 昕

陳

周文育

周寶安

唐

衛 逃

蔣 儼

薛 登

宋

蔣 堂

邵 材

錢 卽

蔣 璿

蔣興祖

周 葵

單 時

蔣 芾

邵及之

吳 政

吳 潛

姚 嘗

莫謙之

明

吳 雲

徐 溥

吳 儼

吳 玘

萬士和

吳達可

史孟麟

吳正志

張納陛

湯兆京

陳于廷

蔣允儀

何士晉

吳中行

路邁

徐槐

張邦紘

王行儉

莫可及

子若鼎
若鈺

孫謀

吳炳

陳貞達

吳登俊

族

盧象觀

從兄象同陳
安毛得五葛

麟

吳貞毓

潘承祚

曹師稷

盧國雲國焄國紘象坤

吳敞瑩廷縉廷柱蜚

潘敏成廷璜

張琳陸志

張緒吉許樹遠

陳寅

任源邃

周源儒

吳起龍

潘喆邵履正

許啟洪

李頎李來

李用楫

子

盧象晉

李則行李文
注李從厚

盧象楨

步匡明徐闇如張利干唐魁徐夢岳蔣

曦陸元望儲振彩蔣章甫季明之康三省蔣七陸二王自

榮吳乾思王承昌袁魁顧文錢順朱興公錢在茲

儲京祚

何捷何掖

捷子百祿姪
清漢長齡

萬濯

堵正明

堵世明

吳其靄

毛重泰

國朝

任宏嘉

補遺

宋

馬伸

黃肇中

許浩

黃天鑒

元

周紹先

邵全節

吳江清弟

明

儲楫

儲由履

徐申懋

儲起潛

陳琅族兄所長

吳允禔

黃鐘斗

蔣永儒丁丕選周濂儒陳有瑞儲謙儲

懋捷朱邦彥何鏞鏞子天龍陳貞禧吳國士儲啟祚王德

源蔣永儼王孝源王祚榮葛敏葛最步守信劉應鳳

周世臣

黃守正吳上軫弟上軫

儲邦輔子封

杭彥清

吳穀戩

杜忱

吳永功趙起濂堵道楠萬象瑞

國朝

徐懋威

吳鴻泰

薛君

陳納陞

孫墜

治績

漢

蔣堪輿

唐

許緒

蔣將明

宋

蔣昂

蔣之奇

蔣之翰

蔣靜

虞大熙

吳懋

蔣億

明

楊得安

杜欽

徐鑑

陳全

尹弼

沈暉

萬盛

胡連

張盛

李雲

陸廣

杭濟

杭淮

芮京

胡忠

湯建衡

邵天和

曹二暘

子司勳
孫應秋

陳儒

楊準楊阜

曹景暘

子司宰

周淳

俞頤吉

潘松

俞霑

子士章

路雲龍

路文範

路進

潘守正

儲昌祚儲顯祚

徐洪祚

徐懋曙

吳宗儀

萬象新

萬德鵬

蔣宏憲

丁天毓

李守俊

周鼎

毛之儁

毛士龍

吳正己

徐紹沆

蔣觀

吳鳴虞

蔣如鼎

湯啟烺

顧一讓

吳士貞

任允涪

吳正心

戴英

吳洪昌

夏尙綱

國朝

蔣永修

周啟嵩

儲曾

潘瀛選

周伯瑞弟仲球

周季琬

路遴

路序弟仲球

萬錦雯孫櫛

蔣龍光

徐階鳳

吳滌

盧士登

莫大勳子士超

儲方慶兄貞慶

許毓芳

郁士超

儲右文

吳曹直

萬丹詔

萬廷詔

儲掄

郁士選

蔣錫震

潘宗洛

萬晉豐

潘眉

萬廷仕

王斗樞

蔣雯

儲之盤子起綸

李飛鯤

路衡

王忠武

蔣天麟

補遺

宋

蔣循祖

元

吳熙

明

儲敬受

潘一亮

徐文燦

萬春

許有節

黃大時

杭士鏞

許士勝

吳三埜

黃大金

萬溥

蔣應震

族子用卿

路雲範 子文翰

湯啟華

史垂則

王彝章

陳景潞

湯欽止

楊大賓

吳應恂

潘紹謨

蔣溶

國朝

陳宗石

理學

宋

唐棣

吳宗旦

明

周衝

萬吉

曹珂

唐音

王升

王永圖

儲乾子

國朝

吳晉刻

湯之錡

補遺

明

吳鼎

續補

明

胡澈

謝士惠

王彝敘

謝三錫

談孺慄

周濂學

國朝

邵贊

萬錦罪

孝友

漢

蔣政

許武弟晏

許荆孫

宋

蔣恭蔣協

許昭先

齊

吳達之 陳元子

唐

蔣列弟 渙

宋

單煦

元

備炳

明

黃玘

徐琳

陳元子

蔣廉

王明俊

許翽從弟

李舒春

史泓

吳景運兄應運

吳箕

許士珍

吳宗良

戴朝榮

黃衷赤

湯鍾壽

李魁

李延謚

史元鎮

楊萬春

國朝

曹應莘

梁王郎

湯迪簡

錢修期

吳玫

徐琳

萬士亨

徐文煜

張倫弟亨

李延謚

李魁

談書

史元鎮

湯鍾壽

陳一經

楊萬春

黃衷赤

陳一教子于

吳宗良

戴朝榮

史君爽

國朝

曹應莘

儲寅亮

許士珍

梁王郎

邵廷紀

吳箕

湯迪簡

王明俊

吳景運兄應運

錢修期

蔣廉

史泓

吳玫

許翽從弟

李舒春

三人

萬迅 子夔

蔣正泰

路念祖

蔣春

柳友德

宗士成

萬鎰

吳徵

湯成亨

補遺

明

儲昌 子笙

徐濟

張邦穀

鄒善祐

楊暉萼楊渭

周繼思

張應鵬

周昌汝

蔣允化

潘良鼎

路文軌

萬人儒萬人佐

任億年

任友恭

徐安世

續補

明

丁文質

蹇軌

儲銘

蹇仁

杭奎

徐陞

萬士安

許鎔

李齊丁燠丁燦黃公

立陳壽章

毛伯昌毛伯晟

楊日淳

徐先枝

張啟孝 子方 張自勵張允德

國朝

楊灤露

杭伊蒿

楊宣猷楊爾猷

屠元孝

陳枝先

朱華衮

許樹偉

徐龍詔

周詠

堵景源

盧素林

徐人龍

莊聖躋

陳其復

張翼運

閔佐成

蔣庠復

王九齡

吳上璆 吳維垠 丁詠暉 丁宜盛 丁榮黃 養潤 王裕仁 蔣遜

宗 蔣元溪 黃天俊

陳貞慶 陳書賢 吳選

沈瑜德

何世鯨

文苑

唐

許景先

蔣父

蔣係

子曙

蔣伸

蔣偕

蔣防

喻鳧

南唐

蔣凝

宋

蔣璨

單錫

單鏐

子子發

余中

元

王天覺

子日宣 日新 日晉

許應邴

明

姚臨

儲可求

儲惟德

馬治

芮畿弟稷

邵賢

李杲

邵珪

卜同

杭濂

吳仕

吳性子可行孫亮奕宗元襄宗達

陸萬里

趙天錫

沈敕

周正儒

許有穀

徐顯卿

蔣如奇

吳國華

路朝陽

儲國祚

堵應畿

吳淑

許肇錄

吳仲立吳退貽周漢石

儲懋時

國朝

陳維崧

黃琦

儲方榮

任繩隗

史紀夏

吳梅鼎

任元祥

周廷求

許昌國

毛元策

萬彥

徐翹鳳族弟見龍

任培元

楊懷遠

儲善慶

儲振

萬樹

徐煥龍

史陸興

周亦魯

俞景宸

儲欣子芝

蔣景祁

謝方琦

謝芳連 潘旂 陳枋子旋

儲華慶 路仍起 徐江普

路朝宗 吳淵子士榮 儲高文子燧

吳澍子企劉族叔誠 盧棟隆 宗芝堂

宗五雲 史陳惠 儲大文

儲恕弟惠 儲在文 儲郁文 儲雄文

徐瑤子洪鈞 杭越 吳崇

顧洸 李荃 史仲升

史高統 吳掄 萬嗣恭

萬受采 蕭趙炎子挺 葉肇虔 葉鳳翥

毛紹義子時霖 張明善子六鈞 蔣入部

陳邦榮子豐垣全豐基孫疇錫銘京鎬燦文 沈牛成 熊翼平

補遺 陳貞貽 丁景澄 許際科 潘大需

徐騰蛟 許君建 湯思孝

陳天策 蔣如統

續補

宋

慕容彥逢 馬令

明

重刊宜興縣志 卷八

蹇曦 吳完

儲天經

任珪 吳夢熊

朱紱

吳驪子達 任景龍

路之陞

許明鉉

國朝

黃羲時 黃一麟

丁璣

陳維嶠 陳維岳 曹亮武

陳維岱 潘大儒

董儒龍孫克昌

周方石子曰暘孫燁

蔣永俶

葉翹 徐璣

許泉年 許古年

史元楷 潘良璣子學

吳文斗

范度周彥 宋士班孫為章

史逢年孫元頴

張鍾岳 潘祖義子巖

徐寬從兄珽美

陳履端

行誼

吳

張秉

宋

吳國夫

隋

蔣宏

宋

時某子彥

邵靈甫

邵民瞻

吳師古

蔣天倪

元

儲廷玉姪士方

岳濬

岳惟至惟元

明

蔣賢

潘永昂

吳以中附興郎

施玘

萬壽曹澤任亮

陳玉陳彝潘岐陳倫吳佐曹龔宋大

德毛溥

褚錦

李愷

吳玉

卜祉

李庭芝

沈榮子彝

邵曙孫暉

盧元京

曹珮

萬士禎

任卿弟道

歐蕙

湯應隆弟應陽

芮宏

吳承裕

吳應期

蔣禮

吳馭

戴時達

徐守魁

路九同

儲邦美

吳挺秀

錢琨

黃體乾

湯得莘

吳洪亮子貞吉

堵維常

謝遴

邵忠訓

胡憲言

陳廷誥

許德士

李亦人子引先李三綱

國朝

李同亨

凌鶚遠

陳榜

楊天榮

潘廷選

吳選

史潔瑄

許鳳

儲善閔

吳繩用

謝旭

潘麟如

吳宗

子其壽

潘起

潘繼堂

尹帝錫

子再泰

任沂

杭翔敏

吳虞衡

子紘初

朱鎬

李永標

王朝珪

儲孫武

補遺

明

路其直

錢瑞

蔣瑞卿

萬士裕

子惟志

謝顥

毛一麟

陳階

徐明羽

子開泰

徐儀世

續補

宋

吳若

黃端友

明

吳經

吳儉

李桂

吳達聰陳禹謨

宗均璿

謝表

重刊宜興縣志卷八

七

楊廷璿

宋遂

蹇益

徐元相

岳儉

王楨

許斌

徐承芳

蔣芸

子應霖
孫如斗

黃棟

湯兆隆

吳有燁

吳啟澤

任與春

子名
臣

周聖瑞

吳世凝

路遵聖

阿寄

許文用

宗麟壽

王士嶷

國朝

何士林

吳國萃

周有全

蔣邦彥

儲國維

莫汝禮

許以經

徐漢超

吳學錄

潘曰誨許明倫

周方

仇兆麟

子元善
元藝

徐邦楨

劉天長

宗世求宗廷璧宗廷

弼

楊廷鵬

楊士義

儲福崑

子遵
鴻

朱縉芳

蔣亨復

史三畏

元孫
士峻

儲灝

潘進

王國琇

陳時英

丁聖貽

張江永蔣師韓

呂鏞

蔣大成

隱逸

唐

馮處士

蔣逸人

陶詳方干

宋

元 薄

蔣之勉

王克疑

元

吳載堅

蔣捷

董蕃

王令顯子仁

未詳

明

王文靜

許天茂沈歷

蔣兢宗

吳日綸子

王超

邵鑑族

李適子

萬善

湯聘

徐守亨

許穎昌子以忠

國朝

吳洪裕

潘紹顯子廷瑜

許肇篋兄肇箕

吳璇

蔣偉俞南吉曹茂才萬津微鄧秉貞

吳永祺

徐徵麟

儲福疇

孫夢簡

陳貞慧

路迪子培

吳固本

楊湛露

周新

王合

萬球

任皞臣

吳湛

路登庸

補遺

明

儲能謙

蔣宏恩

蔣天民

湯鶴翔

謝宜

翟振龍

國朝

萬謙

湯自炎

金輅

續補

明

吳源

王直

許世祥

萬棟從弟

錢日文

國朝

許大就

黃麟聚

蕭鄂

尹毅奎

吳喬森蕭鄰之 喬森子 王鳴九

任大烈

陳貞祥

任繩寵

儲弼明

尹選

吳悅可

周岱鍾

僑寓

梁

到洽

唐

薛戎

杜牧

李幼卿

陸勳

李戡

孫泰

陸希聲

皇甫冉

高雲

顧況

宋

蘇軾子邁迨過孫峴

王居正

慕容暉

蘇庠

鄒浩

李綱

汪藻

胡靖

岳飛子霖

胡松年孫覲

陳克

曾幾

董弁

王葆

周必大

呂祖泰

李曾伯

元

蹇大雅

張簡

倪瓚

周砥鄭元祐徐賁

明

李應楨

沈周

翁信

費宏

舒芬

靳貴

史際

王大用

唐順之子鶴徵

楊守魯

周怡

王穉登

顧祖漢

王畿

高攀龍董其昌

徐元昕

吳默

吳應箕顧杲

楊廷麟 俞安期 鄒元標 劉宗周

侯方域 顧御

國朝 吳綺

胡潛 潘天成

龔勝玉 惲格 謝本弟廷揚子泚

史鑑宗 沈无咎

續補

宋 趙九齡 敖陶孫 李龔

莊夢旂 宗洪

明 詹榮 陸南陽 周天球 曾鯨 廖大受 張復

李流芳 陳子龍

章正宸 程學周

國朝 金敬金 璵璵子鑑圓 周容周高起 顧貞觀

鍾以晟 唐煜燦 毛惕

藝術

陳 許允宗

南唐

丁謙

宋

張駒

元

於材仲

明

蔣子成

邵璨

杭倫

吳國良 李文遠吳善潘生湯生

吳芳

王玉 子廷相卜惠單信楊恣徐汝翼王承學

周衛

金沙寺僧

時大彬

董翰 趙梁元錫時朋

徐士衡

陳用卿陳信卿

周茲

國朝

蔣允睿

陳遠 陳子畦

吳滌

李公實

供春

李養心 子仲芳

歐正春邵文金邵文銀蔣時英陳俊卿

閔賢陳光甫

陳辰

湯啟祐

方瑞 孫東巖

路錦程

徐鶴詔

徐元球

徐承宗

蔣宗琳蔣宗璽

馮 畧

許維嵩

潘 育

陳漢文

王南林楊繼
元陳介溪

吳鉞瑞

周士標

朱 嶼

補遺

明

薛 贊

蹇 徐

國朝

王應遇吳懋談岐

許秋翮

周清南

周天定鄭濟川水西來

重刊宜興縣舊志卷之八

人物志

忠義

兩聞正氣蟠結揚詡與日星河嶽相終古於以扶翊世
教激發人心斯忠義尚已蓋自從容翼贊黼黻隆平與
夫犯顏直諫臨危致命下逮一介之士陷胸決脰効死
疆場雖所成就常變大小不同其精誠不可磨滅一也
今按唐鶴徵府志敘忠義弁孝侯謂乾坤恃以不毀倫
紀由以常存信然哉讀明史盧公堵公傳竊嘆其百折
不回以死報國與孝侯相伯仲此三人者皆天人也謹
遵府志原例列諸卷首餘各依時代撰次云

晉

周處字子隱鄱陽太守魴之子少孤弱冠時膂力絕人好畋獵任俠自喜不修細行鄉閭苦之處謂父老曰今時和歲豐何所苦而不樂耶父老嘆曰三害未除何樂之有處曰何謂也曰南山白額虎長橋潭下蛟并子而三矣處乃入山射殺猛虎投水搏蛟蛟或沈或浮行數十里處與之俱經三日夜人謂其已死皆相慶賀處既殺蛟返聞鄉閭相慶始知人患已甚慨然有改勵之志乃入吳郡見陸雲曰欲自修而年已蹉跎恐無及奈何雲曰古人貴朝聞夕改君但患志不立何患名不彰處遂克已勤學敦忠信尚

義烈期年州府交辟仕吳爲東觀左丞吳平入洛稍遷新平太守撫和戎狄叛羌歸附轉廣漢太守郡多滯訟案牘山積處詳其枉直一朝決遣以母老罷歸尋除楚內史未之官徵拜散騎常侍處曰古人辭大不辭小乃先之楚郡內旣經喪亂新舊雜居風俗未一處訓以忠義又檢尸骸無主者並收葬之然後就徵遠近稱嘆遷御史中丞凡所糾彈不避寵戚梁王彤違法處按劾之及秦雍氏帥齊萬年反僭帝號圍涇陽帝命討之朝臣惡處強直皆曰處名將子忠烈果毅可使詔以處隸夏侯駿西征伏波將軍孫秀謂之曰卿有老母可以此辭處曰旣辭親事君父母安

重刊宣與縣志 卷八
得而子乎萬年間之曰周府君昔臨新平其人才兼文武
若專斷而來不可當也苟受制於人此成擒耳既而梁王
彤爲征西大將軍都督關中諸軍事處知其必將陷已顧
以人臣盡節不宜辭憚乃悲慨就道志不生還中書令陳
準知彤將逞宿憾言於朝曰駿及梁王皆貴戚重臣進不
求名退不畏罪周處吳人有怨無援宜詔孟觀以精兵萬
人爲先鋒必能殄寇朝廷不從時賊屯梁山有眾七萬彤
駿分兵五千令處進擊之請後繼弗許乃與振威將軍盧
播雍州刺史解系攻萬年於六陌軍士未食彤促令速進
處知必敗賦詩曰去去世事已策馬觀西戎藜藿甘梁黍

期之克令終賦畢而戰自旦及暮斬獲甚多弦絕矢盡播
系不救左右勸之退處按劍曰此吾効節致命之日也何
退爲遂力戰而歿時元康七年正月也建武元年追贈平
西將軍清流亭侯命加策諡太常賀循議曰處履德清方
才量高出歷守四郡安人立政入司百僚貞節不撓在戎
致身見危授命此皆忠賢之茂實烈士之遠節按諡法執
德不回曰孝遂以諡焉所著有默語三十篇風土記吳書
若干卷子三人靖早卒玘義興郡侯另有傳札右將軍會
稽內史諸孫翽烏程侯懋襲處爵筵征虜將軍吳興內史
贊武康縣侯潛都鄉侯一門五侯並居要位吳士貴盛莫

與為比參晉史

明

盧象昇字建斗世居縣西南茗嶺祖立志萬曆乙酉舉人
歷任南康儀封知縣父國霽邑諸生母李氏萬曆庚子三
月四日象昇生七歲時母患心病象昇晝夜反側以分痛
病愈乃已年十三就讀城中僧舍距家七十里日將夕聞
父恙卽單身赴道歷深谷叢篁中出入虎穴不稍懼比抵
家已雞鳴矣大父赴南康任挈之行失足墮江中聞疾呼
扶兵部尙書出因得附片木以免象昇白皙而臞膊獨骨
負殊力每誦讀暇輒習騎射縱觀古將相名臣兵略同輩

多笑之弗為輟年十七補博士弟子員天啟辛酉壬戌聯
雋成進士釋褐歸過維揚有冶姬見象昇年少高第美丰
儀願委身焉象昇曰吾豈以精神銷粉黛耶卻之癸亥謁
選得戶部值魏璫用事求外補以員外郎出監臨清倉因
奏中州積旱民鬻妻質子難應追呼請改抵納價以紓民
困於是豫省積逋一清全活億萬戶三藩初就邸參從噪
於途誅求無藝象昇以囊貯米預列水次至卽遺之藩艘
素聞其廉不復肆秩滿稍遷大名知府恤冤獄十七事治
聲日起崇禎二年京師戒嚴募鄉勇萬人入衛事平詔還
郡以副使階行太守事象昇乃遴所募兵日訓練之盡成

精銳時有巨室馬翩翩者任俠爲大奸齊豫燕晉諸盜多歸之號九省通家白晝探丸劫掠莫敢問者象昇率募卒猝擒之立斬以徇其黨不及援遂駭散三年進右參政整飭大名廣平順德三府兵備號天雄軍是時流寇自秦蹂晉蔓延猖獗象昇念山西密邇畿輔躬巡屬境葺城池修樓櫓命山居百姓依險立寨賞糧器械砲石楛木諸禦賊之具畢備而耕牧其中其平原無險則用并村法合小附大鑿渠築垣其餘一如山寨復自爲相度處所時時往來申警之四年舉治行卓異進按察使治兵如故六年正月賊流入西山距順德百里象昇擊卻之二月左良玉之師挫於武安賊從小山澗入真定沙河臨洺等處象昇率師赴援賊遁走四月賊騎數萬屯小西天山象昇與總兵梁甫參議寇從化合擊連敗之石城南五月要之於青龍岡大破之又破之武安連斬賊魁十一人殲其黨數千收還男女二萬八月賊經廣平民趨城郡守慮有變急扃城後至者不得入號哭動天象昇至急呼守納民寇來吾捍之遂自策馬乘城賊聞之夜遁象昇生長於南以文儒進然負膽決便弓馬每臨陣身先士卒與賊格鬪鋒刃及鞍勿顧失馬卽步戰弗爲卻一日逐賊危崖賊自嶺射中象昇額又發一矢僕夫斃象昇提刀戰益疾賊駭走相戒曰盧

廉使遇卽死自是不敢犯其境三郡安堵者數年象昇遂以能兵名先是賊議分兩道一南行躡中州一北行擾畿輔及象昇過北衝於是賊數十萬眾盡竄而南畿輔帖然而中州楚蜀勢若決河賊以十一月渡河陷澠池伊陽從盧氏軼內鄉浙水犯鄖十二月破鄖西上津保康房縣捷於風雨七年正月擢象昇右僉都御史代蔣允儀巡撫鄖陽畿南民萬眾擁馬足若戀父母提攜送至五百里外臨河而返象昇馳至鄖賊已入蜀人民散離招募稍集視房竹諸山縣互有險可憑用守畿南法守之并村立寨人有固志始至缺餉象昇自銷盜帶得百金爲眾作餐於是採

銅鼓鑄出息糶穀患漢江商舶不通造兵船數千西抵商雒南距荆襄轉輸貿易物力大足撥毛兵新兵各五百人石柱兵六百人更番偵伺分布鄖津要害而躬提健卒數百往來於襄宛光均閒未幾賊自蜀反楚復犯鄖象昇與總督陳奇瑜分道夾擊六月及之於烏林關大破之又破之於乜家溝石泉壩康家坪獅子山太平河木竹砭箐口諸處引兵窮追賊恐怖至晝不敢餐慮因炊煙及之也七月設伏蝟溪大擊之前後斬級以萬計其墮篁塹死者無算乃盡竄入秦漢南寇幾盡鄖屹然復成巨鎮焉八年二月三邊總督洪承疇會西甯兵變赴甘肅定亂賊承閒敗

秦師於真甯大帥曹文詔死之而朱陽關蘭草川二師皆潰賊遂分十餘股眾百萬由朱陽關出中州大震八月進象昇兵部侍郎總理江北河南山東湖廣四川兼山西陝西七省軍務賜尙方劍便宜行事與總督洪承疇協辦賊督勦西北理勦東南汝洛告警象昇倍道馳入汝賊前鋒已向楚留眾三十餘萬連營百里勢甚盛象昇督副將李重鎮雷時聲等擊高迎祥於城西用強弩射殺賊千餘人迎祥李自成走陷光州象昇復大破之於碓山自大帥曹文詔陣亡尤世威徐來朝兵潰諸將率畏賊不敢前象昇每慷慨灑血激以忠義軍中嘗絕三日糧象昇亦水粒不

入口以是得將士心戰輒有功九年正月大會諸將於鳳陽象昇上疏曰賊橫而後調兵賊多而後增兵是爲後局兵至而後議餉兵集而後請餉是爲危形況請未必敷士卒從賊而爲寇是八年來絡繹而請之兵反樹賊黨積累而用之餉適賫盜糧也臣以爲兵食大計當思暫費而永甯一勞而久逸督與理宜有專兵專餉請調咸甯甘肅之兵屬督薊遼關甯之兵屬理若遇山林奔突不利騎兵再調川箠滇黔之兵一二萬攀援險阻佐騎兵所不及每月給需餉銀各一十三萬而聽承疇辭三邊臣辭全楚使得併力於所屬之地至各直省撫臣俱有封疆重任一處有

賊一處需援一處需兵一處求調不應輒成水火分應何以支持粉飾太平尙可調停遷就用兵勦賊豈容委曲移那臣謂所在撫臣宜分地責成人人自爲戰守不得以一方有賊輒求調援分督理之兵餉至臺諫諸臣不問事之難易不顧人之死生專事苛求識力不堅者必致因人以自餒卽清白自矢者亦且避忌而灰心據臺省動以尾擊責臣等持論非不盡善但均一勦也有追之者必更有一二重兵或堵之或扼之始無潰決之患前無堵者旁無扼者祇賴一追卽有縮地法遠出其前而賊巧於避兵轉身他向仍然尾賊也卽欲不尾不可得也州縣庫藏如洗折

色萬難措置本色顆粒無資勦兵所至率多閉門堅守惟以身願聽參拏臣以功令責之則曰凡勦寇用兵之地卽兵荒應免之地偶有一二完邑所輸無幾不足以供防兵況勦兵乎賊行甚速且無定向窮兵力以追之尙虞不及今支領芻糧卽使隨手立辦定稽半日之程稍遲一日再遲二日斷無及賊之理矣伏願今以後中外不惜浩費有司無憚艱難各直省毋事張皇諸紳士無好橫議百爾臣工破門戶矢公忠齊心并力務致廓清臣與督臣有勦法無撫法有戰法無守法待賊悔禍乞降再議散遣安插然後輕徭薄賦恤死弔生保固元氣此則今日勦蕩之大局

也疏入奉俞旨聽象昇辭全楚乃起王夢尹撫楚是月高迎祥李自成等七巨寇分道趨東南陷含山和州進圍滁州象昇在西沙河聞警率總兵祖寬游擊羅岱疾馳五晝夜抵滁大戰於城東五里橋祖寬陷陣先登象昇斬賊搖天動奪其駿馬賊連營俱潰大軍乘勝逐北風馳電掣一夫當十呼聲震屋瓦追擊五十里自城東至關山之珠龍橋橫屍枕藉填溝委塹滁水爲之不流賊起數年官軍搏戰以百計而滁州之捷第一是役也象昇以巨寇畢聚期一舉盡殲之而淮撫朱大典疏於設防潰賊得收散亡從亳州還走豫永甯總兵祖大樂邀擊於歸德之穀熟集大

破之副將陳永福又敗之朱仙鎮二月象昇追及賊於裕州合寬大樂偕兵大破之七頂山盡殲自成精騎乃至南陽誓師命諸將分道逐賊而大將旗鼓出鄧州馳使告楚撫王夢尹鄖撫宋祖舜嚴兵守漢江賊可盡殄而漢南無一兵陣而待者當是時象昇晝不離鞍夜不解甲囊中時具米麥餅饑卽嚙之倦卽臥馬足閒馬首掛硃墨汁筒文移往來倚馬立就務一心滅賊如是者半載賊困甚或分股從光化羊皮灘渡鄖襄或竄伏內浙山中而迎祥自成收餘眾復歸秦象昇乃命孔道興防維西左良玉防維東陳永福錢繼功等率兵專備內浙而自引軍趨秦關會承

疇其議兵事在途遺書其家題封烽火三月家書萬金問
二親無恙外其訓子弟曰古人仕學兼資吾獨馳驅軍旅
君恩既重臣誼安辭委七尺於行間違二親之定省掃蕩
廓清未效艱難困苦備嘗此於忠孝何居也願吾子弟思
其父兄勿事交遊勿圖溫飽勿干戈而俎豆勿弧矢而鼎
彝名須立而戒浮志欲高而无妄殖貨矜愚乃怨尤之咎
府酣歌恆舞斯造物之侈民庭以內悃幅無華門以外謙
卑自牧非惟可久抑且省愆凡我子弟其佩老生之常談
惟我一身自聽彼蒼之禍福其訓王夫人曰予爲官一十
三年歷部郎郡守監司以及治鄖撫楚日惟國事蒼生爲
念不敢私其妻子未嘗有負君民室鮮冶容家無長物今
任討賊艱苦萬端成敗利鈍付之天毀譽是非聽之人頂
踵髮膚歸之君父惟願作吾匹者以媳代子篤其婦規以
母代父敦其家訓使兩親娛於堂四稔習於學吾願足矣
他何計焉時大寇西遁督旅入關寄此相勉六月師次潼
關時承疇屢被詔責奪五階軍氣不揚象昇憂之謂秦督
吾左右手脫以法罷將奈何已而適賊野掠偵之則闖王
大隊也命祖寬迎擊之寬躍馬大呼一戰斬闖王頭軍中
歡譟闖王者高迎祥也賊中號最強李白成其甥也號闖
將朝廷懸重賞購其頭象昇念以今日功讓承疇當保全

乃婉諭寬寬有難色則下馬拜寬驚掖起聽命承疇由是還尙方鑄級盡復方欲與承疇會勦秦賊而先是賊之由羊皮灘渡者瀾漫宜城穀城上津山谷間鄖西縣令皆遁象昇聞之乃提兵還七月至襄追擊賊鄖西八月京師戒嚴有詔再賜尙方督天下兵勤王時良固已破涿亦岌岌象昇星夜入援

大兵從建昌冷口出關甯總監高起潛惟怯不敢遏象昇出口迎之收回被難民萬餘歷視塞外邊地登木葉山而回至灤陽則別有詔進兵部尙書總督宣大山西軍務象昇任總理未一載將士甫調集賊望風而靡旦暮可滅一

旦移任他所東南羣盜酌酒相賀由是咆哮突出并部連橫掃蕩州郡駸駸不可復制有明卒以此亡象昇受命卽出居庸關策馬闕東界故事大帥行塞分馬纛左右翼傳呼裨帥而下箠矢插弓兜鍪掛鎧伏道旁象昇盡撤之控騎行六百里日呼堡上老兵訊利弊察險夷老兵意其偏裨也狎之言狀甚悉抵署則宣東形勢已歷歷在掌握間十年春因邊粟告匱請屯政括三邊裁貯銀十萬散司道官俾周視原隰高下土地所宜募民給種所在佐貳循行勸相及秋大熟積粟二十餘萬緣邊沙磧盡爲沃壤關甯備兵蔡懋德遣使求其法上聞之諭九邊皆式宣大是時

象昇勤勞過下吏子夜刻燭雞鳴盥櫛思得一要霍索披
衣坐而待旦稍暇卽較獵角射嘗以箭銜花五十步外發
必中遇平岡呼酒坐地與諸將講論兵法語及時事則慷
慨椎心髮豎眶裂諸將聞之皆起舞又時時歷塞外諸山
指點插卜板升并三十六家情形洞然是年冬乘堅冰渡
河入套過李陵墓望拂雲堆揚兵大獵從容振旅而還十
一年三月卜插二酋合十餘萬眾窺宣邊僞言求撫象昇
夜馳至天城觀形勢策彼欲窺雲晉誘我師入宣乘虛而
入因檄雲晉兵勿動而疏言求款非實情中樞楊嗣昌手
書至力主撫象昇力主戰相持久之乃密檄雲師西來宣

師東來而自率兵出羊房堡刻日鏖戰卜插聞之乃遁事
聞嗣昌謂無血戰功賞不行先是嗣昌奪情任中樞墨經
從事至是大拜服緋袍上政府少詹黃道周折諸廷象昇
遺書諷之曰變禮易制誠非易事但使相業特盛無愧救
時亦一道也嗣昌旣以論邊事牴牾至是得書滋不悅兩
人水火之勢由此成五月朔聞父訃乞奔喪疏五上始得
侯代之旨而新督陳新甲在蜀未卽至時東事日迫嗣昌
慮禍及已百計圖和授意薊門總監鄧希詔遣賣卜瞽者
周元忠潛詣關東爲之媾會謂兵不臨城不卽撫九月
大兵入牆子嶺青山口殺薊督吳阿衡毀正關至營城石

匣駐牛蘭有詔召宣大山西三總兵楊國柱王樸虎大威入衛三賜象昇尙方督天下援兵象昇伏地痛哭麻衣草履誓師馳疏報曰臣非軍旅才愚心任事誼不避難但自臣父奄逝慘傷潰亂五官非復昔時兼以草土之身踞三軍上豈惟觀瞻不聳尤虞鐘鼓不靈已聞總監高起潛亦衰經臨戎象昇謂其眾曰吾三人皆不祥之身人臣無親安有君樞輔奪情亦欲使予變禮以分愆處心若此安可與事君乎當時嗣昌起潛主和議密謀輦金帛出邊已有事大事小之疏長安競嗤唾則謂我有樂天之言彼無畏天之意象昇已微聞之十月三日入都平臺召對問方略

對曰臣主戰帝色變良久曰朝廷原未言撫撫乃外廷議耳隨奉旨會議安定門嗣昌媚大瑞坐居下象昇略讓謝直就上坐昌言主戰謂城下之盟春秋恥之嗣昌知象昇意不可奪嘿然退乃陰與起潛計左右牽掣之明日帝發萬金犒師嗣昌送之戒曰毋浪戰遂別去十一日師次昌平帝復遣中官齎帑金三萬犒師明日又賜御馬百太僕馬千銀鐵鞭五百象昇曰撫果外廷議也帝意甚銳矣遂決策戰因檄諸路兵各簡勁騎三百期於十五夜分四路十面襲擊不奮者殺無赦令下而三屯營陳鎮兵已奉監檄調之東象昇頓足曰若輩撓我至是耶因疏請分兵則

議宣大山西三鎮屬督關甯諸路兵皆監統之起潛擁重
兵擇便地象昇名督天下兵實不滿二萬次順義十七日
嗣昌至軍象昇責以阻師誤國之罪嗣昌曰誰知之象昇
卽言瞽卜者周元忠講款往來非一日事始於薊門督監
受成於本兵通國聞之何可諱也嗣昌頰赤曰直以尙方
劍加我矣語塞而去十一月朔

大兵三路南下一由涑水攻易一由新城攻雄一由定興
攻安肅象昇遂由涿進據保定命諸將分道出擊象昇親
率兵大戰於慶都又戰於真定而樂城獲鹿趙州相繼皆
力戰由是樞瑞騎虎難下憂不在外而在象昇計不殺之
不止編修楊廷麟抗疏言南仲在內李綱無功潛善秉成
宗澤隕恨國有若人非封疆福嗣昌大怒謫廷麟兵部主
事參督軍將并殺之總監方某首詆象昇糜餉逗留詔切
責且奉不許近城之旨至真定真撫張其平閉闔絕餉軍
中缺糧已五日有二卒向村居覓草料象昇揮淚斬之各
撫按守臣皆受樞瑞指並誣督臣擁師不救一日疏揭五
六上十二月命閣臣劉宇亮督師奪象昇尙書侍郎視事
嗣昌旣過餉不發且并欲盡散其兵乃偽檄雲晉有警雲
帥王樸引兵徑去當是時象昇提殘卒數千人饑疲已甚
次宿三宮野外畿南三郡父老聞之叩軍門請曰天下洶

洵且十年明公出萬死不顧一生之計爲天下先乃奸臣
在內孤忠見嫉三軍捧出關之檄將士懷西歸之心棲遲
絕野一飽無時脫巾狂噪雲帥其見告矣明公誠從愚計
移軍廣順召集義師三郡子弟喜公之來皆以昔非公死
於賊今非公死於兵同心戮力一呼而裹糧從者可十萬
人孰與隻臂無援立而就死哉象昇泣然流涕謂父老曰
感父老義雖然自予與賊角經數十百戰未嘗劬今日分
疲卒五千大敵西衝援兵東隔事由中掣食盡力枯且暮
死矣毋徒累爾父老爲眾號泣雷動各攜牀頭斗粟餉軍
或貽棗一升曰公煮爲糧十二月十一日進師至鉅鹿賈

莊時起潛擁關甯兵在雞澤距賈莊五十里往乞援不應
象昇知必死謂楊參軍何辜授檄乞餉真定促之行卽上
馬索戰諸帥皆伏地告謂往必死盍少待象昇按劍髮上
指兩背盡裂叱曰吾今年三十有九以一死報國恨猶薄
肯從我者願勿怖皆收淚起行至蒿水橋遇

大兵象昇奮刀大呼未數合手擒一將蟒甲銀盔遂各還
營夜半聞颯策聲四起數萬騎圍賈莊詰旦騎來益眾環
之三匝象昇提長刀上馬周視命虎大威帥左楊國柱帥
右礮以次第發相擊四百餘礮麾兵疾戰自辰至未礮盡
矢窮短兵相接是日天霾日暈無光軍中對面不相識大

威急挽象昇馬請潰圍出象昇以刀剗其手揮之去曰吾不死沙場死西市耶騎圍之數十重身被四矢三刃猶奮呼手格殺數十人而仆圍人楊陸凱不忍眾躪其屍以身蔽之背集二十四矢以死家丁顧憲見象昇斃亦自刎其旁一軍盡覆大威國柱潰圍得脫十五日副將劉欽獲其屍白網巾麻衣通用督師印印之楊參軍廷麟迎入真定盟面刮髮辨其刀瘢左腦一右腮一面門一兵民集視號踊畿南數郡家祭巷哭咸曰盧尚書死吾輩無噍類矣然樞璫憾未已順德知府于穎上其狀嗣昌匿之偵事總旗官俞振龍以督師死事還報嗣昌怒鞭之三日夜且死張目曰天道神明難枉忠臣而誣之者或言己東降或言快醉歌樓火熱自斃家人待命者慄慄惶懼幽閹逾八十日不敢閉至明年二月二十八日始大殮神色如生象昇既死中原無復能討賊者承疇松山之役兵敗東歸嗣昌所薦熊文燦亦屢憤事十二年九月嗣昌不得已出督師賊玩弄如嬰兒嗣昌出揭曰斬張獻忠頭者賞萬金賊出揭曰斬楊嗣昌頭者賞三錢後張獻忠害襄藩李自成害福藩嗣昌知賊必殺己師次荊州自縊嗣昌死廷臣盡發其奸乃贈象昇太子太師兵部尚書賜祭葬世襲錦衣衛千戶福王時追諡忠烈

國朝康熙二十七年奉

詔本邑建祠以特牢祀乾隆五年

命祀廣大順三府名宦四十一年正月

賜諡忠肅

制曰取義成仁式著艱貞之烈易名表行爰昭獎卹之公
眷致命之可風曩迹未淹於異代期扶綱之攸賴休稱允
協於春秋爾故明督師兵部尙書盧象昇砥行能堅秉誠
克裕時遭坎坷恆仗節以無撓殉義從容竟捐生而不悔
朕披覽信史軫念忠徽予褒顯於崇祠用隆秩祀示表章
於往籍載錫嘉名象厥生平諡爲忠肅於戲溯芳徽於頑

廉懦立節或重於泰山彰定論於世遠風微榮更逾於華
袞幽光特闡鑒當年皦日之心正氣咸伸勵萬古疾風之
節欽茲茂典慰爾英靈

堵允錫字仲緘世居縣北之前亭大父佳因家難徙居武

進夾山父維常

一作讓

年四十未舉子禱於句曲之茅峰夢

神告曰吾遣牧牛兒爲若嗣萬曆辛丑十二月八日母陶
夢牧豎投懷遂生允錫於夾山父母故呼之曰牧子及長
乃自號牧遊生十一年而父母俱喪熒熒子立流離踣頓
不可名狀而負氣跌宕落魄無賴人目爲癡年二十遊無
錫馬太史世奇見而奇之允錫遂執弟子禮居門下是年

卽以錫籍補諸生時天下將亂邊事充斥允錫慷慨思立不世功乃爲書抵郡太守自薦邊才欲北詣經略熊廷弼曰熊公卽知兵非我佐之事不濟太守何應瑞目笑之曰狂生然私偉其言辛未四月復歸前亭故居癸酉舉於鄉丁丑成進士釋褐後卽假歸自以幼喪父母痛於心廬墓側三百日墓上枯桐復生有蛛絲結成孝字黃閣部道周作禮問唁之己卯四月謁選得南戶曹庚辰二月權北新關時內使崔璘在浙勢甚張允錫不少屈曰設吾以忤璘失官不較榮於司權乎乃條陳權關利弊十事剔釐夙弊殆盡時值淫雨連旬米價湧貴因捐稅以招集糧買其師

馬世奇寓書曰聞米艘盡捐稅額杭城萬井人倚更生眞轉移造化五色補天手也部議司關清惠第一加二秩辛巳三月任滿回部會同邑周相國延儒再召謁者填門允錫獨不往周屢使人要之旣見無一語周曰仲緘亦有所囑乎正色曰某何求但得一極危險地可以畢命朝夕者足矣周嘿然尋出知長沙府十月莅任見時事孔棘大修武備察山川形勢作星沙守城議鎮南立新營并左右二舊營日夕訓練之壬午四月臨藍賊蕭相宇廖二慶糾粵西生猺諸洞靛賊各鎮老馬子寇甯鄉聞報夜集兵得百五十人馳救之同列謂孤軍難進允錫曰我速救賊疑有

大兵至必走不可失也賊果錯愕宵遁追及之大虎坪會武岡黔沅兵亦至合勦於黃柴盡殪之又破醴陵賊斬其魁草上飛等遂以知兵名吉藩宗支蔓延多兼并民田賦煩役重會王宗與民爭田同知王秉乾聽之王宗不直王喉宗使譁與秉乾爲難民聚眾數千於南倉欲焚藩府時初昏允錫聞變卽馳至南倉委曲諭之民素服太守忠義乃解散在任期年榜銷十三年積案三千餘事民賴以安癸未四月舉廉卓入覲而流寇張獻忠於八月陷長沙上知允錫有幹濟才命復任閒關萬里爲兵盜所阻屢濱於死至甲申二月始抵任時賊甫退流離之民存遺骸及允

錫馳入武昌迎巡撫何騰蛟駐潭躬擐甲胄修築城垣招徠眾庶上地方十弊疏情詞悱切有旨陞武漢黃兵備道而北都之變適至允錫慟哭作墜龍騷五章六月奉福王命提督湖廣學政楚地屢遭兵燹學校殘破士之來者設僑學於漢陽允錫至集諸生於明倫堂訓之曰諸生登此堂不可不知明倫之義世治則君明臣良天下之父子夫婦昆弟朋友並受其福不幸國破君亡則父子夫婦昆弟此離朋友解散故四倫必藉君臣一大倫始合普天率土誰非臣子今日明倫之務莫急於復仇復仇必須人才人才發爲經濟經濟本於學問學問根於忠孝爾多士刻刻

以忠孝爲心在邦爲彥士出身爲良臣形影念慮起居動靜皆是復仇之時皆是復仇之地所謂人心不死不待舉而操必勝之術也時雖職學政而注意人才旁採謀略無日不以治兵講武爲急乙酉三月巡試湖南講學於武昌學宮欲感激諸生相與戮力諭之曰我國家三百年尊賢養士一旦中原淪喪生民塗炭一至於此朝廷負士歟士負朝廷歟有肝血者莫不勃焉憤仇矣今日與爾多士開宗大旨要以聖賢爲歸以理學爲任當下扼定百折不磨乃是戴員履方擔負綱常之男子至其入門處正不在多祇要勘得義利界限分明生死關頭透徹知行力自然智勇深沈於以入聖躋賢思過半矣試以義利言之義者苦遠難至利者喜近易從遽欲撇去千駟萬鍾退而薇蕨瓢飲甘苦殊絕豈能以夸語欺人子不云乎富而可求執鞭亦爲如不可求從吾所好利者我所不必有義者我自舍我自求諸非分一朝詭遇千古貽譏西山之歌與牛山之泣孰得孰失義利懸殊正可當下醒悟更以生死言之人當鼎鑊刀鋸何暇復談道義性命可愛勸人棄擲此難入之語也然吾非要人輕性命正要人愛性命何者性者有生而來命者天衷所降如忠孝廉節成仁取義皆吾性命內固有之物能愛此者堅如金石壽如邱山生

固不朽死亦不朽今人所戀戀者非性命也血肉耳肢體
軀殼參養而成長者耄短者髻角吉者塚林凶者溝壑
稍掩見聞蟻攢烏啄此死固朽生亦朽也吾與多士不愛
已之有而愛烏蟻之有清夜自問有不啞然者乎吾願愛
性命者愛得了愛得了則鼎鑊不須慷慨以赴直可從容
而就也當是時諸生聞之莫不毛骨皆悚至有泣下者課
士畢旋謁督師何騰蛟於長沙進策曰不措餉不能輯兵
不招降不能張楚何深然之是年六月南都失守允錫聞
之痛哭累日遂與章曠楊培東等起義兵設三科募士有
幼讀詩書長嫻韜略慷慨願立功名者爲上科優以不次
之禮年力壯茂慕義從軍者爲次科給以代耕之祿落拓
倜儻註誤犯法希圖開贖者爲下科寬以功折之令他如
奇人俠客精曉陰陽術數熟習火器弓馬及技藝醫匠凡
有一能足用者悉收錄立君子營選才敏精銳者充之不
稱兵丁稱君子以示崇異其得三千餘人分十營以爲親
兵每營設都總一員統三百人都監二員分領一百五十
人都哨十員統三十人都長三十人領十人一營十哨哨
各有專業最驍勁者爲神鋒都習火器者爲神火都習鎗
者爲神鎗都習射者爲神臂都都總以守備出身都監以
把總都哨以副總餘都以効用把總出身各給以空頭劄

付有功遞加陞賞大申軍法以厲之時騰蛟何字雲從黎平人歷官大

學士追封督兵駐武昌凡機務多就諮訪特奏允錫攝湖

北巡撫事駐常德八月唐王立拜右副都御史實授巡撫

先是闖賊李自成有從子錦亦眇一目軍中稱為小李自

成死錦等十八部擁眾三十萬自川陝來剽掠荆湘間屯

澧州界上聲言約我軍會獵遠近大震允錫曰國家新造

勢不能勦當議撫事成宗社之靈否即吾致命之日偵知

自成妻高氏一以為錦之母有智略軍事皆取決而高氏弟一功

驍勇為諸軍最乃移檄何騰蛟令遣人往諭而已單騎由

武陵過澧水達草坪入其營見錦等開誠慰諭導以忠孝

大義慷慨激切眾皆感泣聽命稱詔賜高氏命服錦一功

蟒王金銀器三軍皆踴躍即日軍中留宴高氏出拜謂錦

曰使汝曹贖前罪洗惡名皆堵公賜也汝不可負於是李

錦高一功田虎張能賀藍袁宗第塔天保黨守素李來秦

馬某三十萬眾皆就撫聽允錫節制別部田見秀劉汝魁

聞之亦來歸事聞唐王喜加允錫兵部右侍郎兼僉都御

史手書慰勞授錦御營前部左軍一功右軍並掛龍虎將

軍印封列侯賜錦名赤心一功名必正他部賞賚有差號

其營曰忠貞營封高氏貞義夫人命有司建坊題曰淑贊

中興允錫遂與赤心等深相結倚楚勢大張而劉體仁諸

營先歸騰蛟者亦引與赤心合眾益盛允錫以芻糧難繼令散處江北就食丙戌二月率師攻荊州久不下推官趙振芳曰降將新附軍糧不繼恐有貳心且彼援師將至今惟決水灌城可以速下允錫曰我何忍民之魚乎弗聽會援兵至有田偵者漏師潰圍赤心等大敗允錫驚憤墮馬嘔血幾死回常力疾視師發張光萃守澧州楊國棟守回子河袁宗第守新安李赤心高必正守夷陵五月荆師壓境出新安兵擊之大敗荆師於草坪八月閩變永明王立除東閣大學士兵部尚書封光化伯允錫謂封疆之臣恢勦無成功豈敢冒恩固辭封不受丁亥三月長沙破騰蛟

退駐衡州

大兵至牛皮灘允錫遣楊國棟王一賓禦之眾寡不敵師屢卻允錫亟往澧州調澧陽伯馬進忠兵進忠未應大兵突襲常德守鎮周師忠為內應常遂破允錫自澧返中途得報乃退駐慈利國棟一賓收殘兵來歸袁宗第亦移兵至進忠光萃俱避入永定七月允錫入永定調茅岡施溪容梅各土司悉力捍禦八月大兵破武岡王將詣柳州甫出城劉承允迎降車駕幸脫兵部左侍郎傅作霖死之十一月允錫冒險趨夷陵簡閱忠貞營兵馬夷陵地界西川宗室經略朱容藩僭號監國

開行臺於白帝城下州鼎沸允錫聞之恐變起旦夕亟入川以大義責之輒毀行臺銷元帥印其黨悉解散戊子二月還永定三月朔大集諸將誓師對二祖列宗神御前慟哭人人感泣屆期行師禱六纛之神告之曰某此行利鈍未可期誓當身殉無還心皇天鑒之祖宗臨之惟諸將士共勗之由是馬進忠張光萃楊國棟輩皆踴躍奮力攻常城三日克之王進才復桃源袁宗第復澧州李赤心高必正連拔荆門宜城等州縣軍聲復振五月長沙鎮將徐勇以長沙兵侵常發進忠兵擊敗之踰月

大兵繼至戰於麻河允錫與進忠議曰辰州雖據吾上游其將馬蛟麟以孤城必不敢輕出吾曾有檄招之其意尙有待長沙爲湖南諸郡咽喉今徐勇雖敗實吾肘腋憂急檄忠貞營併力攻之則長沙可復長沙復則江楚可定也議定卽移檄忠貞營必正先率四百騎赴約有奸人鄭古愛與允錫有隙乃說進忠曰將軍本督師何騰蛟所進者也今與忠貞營併力攻長沙事成則允錫受其功不成則移禍於將軍何利焉進忠惑之遂暮夜燒城走赤心繼至見常城燹毀發憤曰進忠去我輩獨不能下長沙耶允錫乃委監軍毛壽登守常自率忠貞營從甯鄉益陽進兵湘潭九月克之十月兵抵長沙城守甚堅月餘不下初騰蛟

先撫馬進忠王進才號忠武營允錫繼撫忠貞營兩營多不協騰蛟欲乘閒分其處嘗致書允錫曰吾與敵戰嚴關日月橋三帥敗遁進圍零陵指日可下各郡邑盡入掌中聞忠貞營諸盟駐節中湘分取衡陽則功又有所屬矣近王馬諸勳舉動乖張吾已有檄諭之諒不負予也至是騰蛟克衡永率師次潭會金聲桓等守豫章

大兵圍之急騰蛟乃復檄允錫調忠貞營援之允錫本謀以全力復長沙恐兵分勢弱其勢難成持未決李赤心曰何督師旣以長沙自任安用我軍且豫章亦不可不救允錫遂東行十二月至袁州己丑正月

大兵知允錫已東從湘江北岸水陸並進夜襲潭進忠跟蹤走騰蛟被執不食死之允錫在袁聞之痛憤幾絕自是而忠貞營之聲援亦孤越三月江省亦潰江督金聲桓王得仁俱戰歿

大兵踵至允錫退守衡陽四月朔戰於草橋敗績收潰卒壁耒陽初五日永興破族子正明死之乃自耒陽退入龍虎關欲集忠貞營兵背城決戰而守關爲楚鎮曹志建素忌允錫襲殺親兵五百人允錫及子世明十餘騎夜走搖峒何家寨尋走賀縣招集散亡從兵稍聚當是時允錫久臨行陣內外無援朝路不通思欲入覲以觀朝政計圖再

舉乃遣子世明先齋奏詣行在世明暴疾卒於陽山六月
抵肇慶見王行在時黔帥孫可望據有雲南十八府願聽
撫欲求冊封廷臣畏其威不敢許允錫曰昔漢高王韓信
於齊固非得已今及其投誠降勅封之使恩出朝廷乃可
得其用請上鑄平遼王印封之議始決事詳吳貞毓傳在朝甫三
日楚粵警報迭至允錫涕泣請出兵王特賜龍旂十二徵
調天下兵馬糧餉加上柱國太子太傅文淵閣大學士吏
兵二部尙書七月師次平梧徵調滇黔兩廣巴蜀各勦鎮
胡一清趙印選張光壁王祥孫可望李定國馬進忠馬惟
興俱發偏師出楚是時各路將帥驕惰士卒罷頓又多染

疫瘴不應調允錫馳入忠貞營壁分兩營劉世俊劉國昌
各萬人從征八月平南寇徐彪作亂討平之十月次潯州
俟諸鎮兵集乃東發允錫歷年征戰勞苦憂悴常常扼腕
嘔血比連喪子姪入朝又值李元允用事劉湘客袁彭年
丁時魁金堡蒙正發附之朝中謂之五虎每有奏請輒爲
掣肘諸營又多跋扈觀望不肯聽命展布益難遂發憤成
疾疾且革強起冠帶望闕拜遺疏略曰臣受命以來罪大
孽重辜負君恩不復自量擬再合餘燼少收桑榆不料調
兵則一營不發若曰有兵則豐其羽翼也索餉則一毫不
與若曰有餉則資其號召也致臣如窮山獨夫坐視疆場

孔棘號血拊心略無展布昨上西山橫邑感厲大重一病不起遂快羣腹臣以萬死不死之身不能畢命疆場一旦死於枕席是爲恨也臣死後伏乞簡任老成用圖恢復若國家大事惟聽李元允等數人成敗可虞臣死矣不勝餘憾拜疏訖又南向拜父母曰兒死不獲更還邱壠矣及將絕呼筆題其象曰有明堵子生而精敏遭家不造誠身事親遭時多難致身事君四十九年孤兒逋臣而今而後浩然蒼旻遂卒時十一月二十七日也三軍號慟如喪父母王聞之震悼輟朝五日諭祭九壇贈上柱國中極殿大學士太傅兼太子太師鎮國公諡文襄

明史云潯國公諡文忠

正明世

明以從軍死皆予卹允錫自受業馬太史後遂專務聖賢之學雖軍中馬上未嘗暫廢所著有禮經澤書詩經澤書

春秋治皇明史綱

洪武至天啟十四朝事蹟

詩有耐可吟馬革集亂後

稿多不存世明既卒允錫遂無子其門下士茶陵尹惟日令和平遣人迎其柩將送歸宜會惟日又卒柩滯中途凡三徙其所其後再從子景源聞關楚粵尋訪經年丙午二月始得其柩于黃梅之騎龍庵扶歸耐葬岳山祖壠同年生兵部尙書孫順爲作墓表

孫順墓表略曰公以命世之英處國家多難之際國破君亡千古時勢之難莫甚於此夫知不可爲而爲之者

非知不及義在則然當其建旗推轂申令風行持虎執
獲智勇電發至單騎以撫李高非具太史子儀之謀略
諸葛公休之撫馭彼蜂目狼心詎甘食葚懷音腰韉作
我材官夫然後大湖南北始無伏莽翦荆之患得一意
以向中原國祚相延十有三載不可謂非公再造之力
也特以地蹙餉匱諸降兵不免騷擾亦天時人事至此
無可挽回何容引爲公咎方其大舉復湖也何公自嚴
關拔衡永而下公自常武率師而北先取湘潭若此時
諸將同心猜忌不作合力攻星沙且且暮下奈何遣忠
貞營鼓行江右兵分勢弱遂爲所乘致有襲營之敗蓋

忠貞營一見忌於長沙合營之日再見忌於龍虎關襲
殺之時遂置封疆於不可爲天實爲之其謂之何在朝
甫三日卽出閣督師變占星隕天不愍遺至今稱宏傑
精忠之士惟何中湘堵鎮國二人中湘殉難疆場鎮國
盡瘁師旅道固各盡志則同趨與日月爭光矣

重刊宜興縣舊志卷之八

人物志 忠義

漢

蔣澄字少明漢兖州刺史詡四世孫詡生會稽太守助助
 生司徒晃晃生橫仕光武朝為將軍橫生九子澄其季也
 建武二年橫從帝討赤眉有功封浚道侯為司隸匡路譖
 死眾莫敢明其冤九子悉降徙澄及兄默渡江居陽羨泣
 血枕戈誓將復讐時童謠曰君用讒慝忠烈是殛鬼怨神
 怒妖氛充塞帝聞之覺寤族誅路錄橫諸子默封雲陽侯
 終諫議大夫澄封山亭鄉侯尋拜婺州刺史固辭疏三上

不許乃受命治尚寬仁多惠政建武八年發大饑澄不及

請命發倉粟賑贍封邑內遇歲歉即盡散所儲租民屢賴

以活帝降璽書褒之年七十有一卒自封邑之民及發民

胥懷思其德爭為立廟祀之默子何前將軍邵陵侯孫志

龔祖封澄五子孟陽羨東亭侯通西亭侯休襲父封丹陽

太守政荆南刺史元兖州刺史澄崇祀鄉賢祠

鳳舊 參漢書 王升徐階

吳

周魴字子魚父賓仕吳為諮議參軍累官廣平太守多治

績魴少好學舉孝廉為甯國長遷錢塘令討叛寇彭式旬

月平之進丹陽西部都尉黃武中鄱陽大帥彭綺作亂以

魴守鄱陽與胡宗戮力致討生擒綺送武昌加昭義校尉

奉密旨誘魏大司馬曹休魴連賫七牋備述背吳歸魏之

意言辭懇切休果信之乃率騎十萬人皖魴與陸遜合眾

截擊斬獲萬計權大會諸將歡宴獎賞加裨將軍賜爵關

內侯賊帥董嗣負阻劫掠豫章諸郡吾粲唐咨攻之不克

魴表乞罷兵遣間諜授以方略狙擊殺嗣嗣弟懼請降由

是數郡獲安魴賞善罰惡恩威並行在郡十有三年卒

國志參 史綱 三節

晉

重刊江東縣志 卷八 忠義 三

周玘字宣佩處長子強毅沈斷有父風太安元年州刺史
召爲別駕從事累薦名宰府除議郎時妖賊張昌旣敗其
黨石冰尙據臨淮玘結南平內史王矩吳興太守顧秘同
起義兵與右將軍陳敏合討平之旣而敏恃功驕恣叛於
揚州帝命玘爲安豐太守四品將軍討敏玘稱疾不行密
告鎮東將軍劉準令發兵臨江已爲內應卒與顧榮紀瞻
共攻敏斬之建康夷三族吳興人錢璿謀不軌殺度支校
尉陳豐焚邸閣自號八州都督寇陽羨帝遣郭逸宋典討
之並以兵少未敢前玘復率鄉里義眾與逸等俱進斬璿
傳首建康玘三定江南開復王略帝嘉其勳加威武將軍
吳興太守封烏程侯吳興寇亂之後饑饉游臻盜賊公行
玘撫安威惠兼至百姓敬愛之境內甯謐帝以玘頻興義
兵勳誠並茂乃以陽羨及長興之西鄉丹陽之永世特置
義興郡以彰其功後進爵爲公卒贈輔國將軍謚忠烈子
勰嗣

周筵處之孫靖次子卓犖有才幹歷官黃門侍郎玘子勰
謀作亂潛結吳興功曹徐馥使殺太守袁琇奉叔父札爲
主札子續亦潛聚眾應之馥敗死續兵未解丞相睿議發
兵討之王導謂發兵不易續兄筵忠果有謀獨使筵往必
能誅續從之詔給力士百人從行至陽羨與太守孔侃協

謀卽坐上叱力士吳曾格殺續因欲誅勰札拒不許筵不復過家省母長驅而去遷太子右衛率及王敦難作筵聞札開門延寇憤咤慷慨形於辭色其公忠如此敦旣得志忌周氏強盛一門五侯誣以圖謀不軌皆遇害

錢廣字敬平與周玘協力誅陳敏初敏以討石冰功自謂勇略無敵遂據江東而加禮諸豪傑名士周玘顧榮等時廣亦爲敏司馬及周玘密啟劉準遣揚州刺史劉基討敏敏使其弟昶將兵屯烏江玘密令廣謀殺昶因勒兵朱雀橋東敏使甘卓討廣卓從玘榮要說與其攻敏平之廣卒贈永世縣侯

已上俱參史綱

齊

周山圖字季寂氣力絕眾食噉兼數人不事生產恒願爲將宋元嘉二十七年魏軍至瓜步臺符取健兒山圖應募領白衣隊主以軍功除員外郎加振武將軍賜苑西宅一區鎮軍將軍張永侵魏山圖率兵迎運爲虜騎所圍結陣死戰突圍出多所殺傷魏軍服其勇呼爲武原將及永軍敗山圖收散卒千餘人守下邳城是時豫州淮西地新沒虜立鎮歷陽計圖南伐以山圖爲龍驤將軍屯兵浹口廣設購募兵威大振討東海寇田流及賊帥杜連梅洛生山圖分兵掩擊皆平之豫章賊張鳳聚眾劫抄明帝命山圖

討之先以羸卒誘敵設伏水涯擊斬鳳餘眾悉降元徽三年加建武將軍督高平下邳淮揚淮西諸軍事時齊高帝蕭道成輔政山圖密啟曰沈攸之入有異圖公宜深爲備蕭公笑而納之後攸之果叛世子蹟爲西討都督啟山圖爲軍副行至潯陽蹟欲畱屯湓口眾議謂城小難固不如還都山圖曰今據中流爲四方勢援不可以小難之苟眾心齊一江山皆城隍也蹟意乃決道成聞而嘉之攸之攻郢城山圖策之曰昔嘗與亟同征伐悉其爲人性度險刻無以固結士心如頓兵堅城之下適爲離散之漸耳攸之既敗蹟嘆曰周公前言可謂明於料事矣建元元年齊受

禪封晉興縣男邑三百戶假節督兗青冀徐州東海朐山諸軍事二年進輔國將軍盜發桓温冢大獲寶物客取遺山圖拒不納悉簿以還官人皆服其廉介世祖蹟踐祚遷竟陵王鎮北司馬帶南平昌太守將軍如故以湓城之舊出入殿省甚見親信轉黃門郎領羽林四廂直衛築墅舍新林晨夜往還上謂之曰卿罷萬人都督而輕行郊外自今往墅可甲仗自隨以備不虞及疾上手敕參問遣醫給

藥永明元年卒年六十四

節齊書
參南史

周盤龍仕於齊爲散騎常侍建元二年春魏攻壽陽齊高祖命假節助豫州刺史桓崇祖拒敵大破之三年魏侵淮

陽圍甬城齊遣將軍李安民與盤龍救之盤龍子奉叔以二百人陷陣深入魏以萬餘騎張左右翼圍之盤龍馳馬奮稍直突魏陣所向披靡奉叔已出復入求盤龍父子兩騎縈繞衝擊莫敢當者魏師敗退盤龍累封純陽侯

本通鑑參

舊志

梁

陳慶之字子雲從梁武帝平建業除奉朝請普通中魏徐州刺史元法僧求內附慶之與胡龍牙等率諸軍迎之除宣猛將軍攻拔魏豫州降其刺史李憲轉東宮直閣賜爵關中侯大通元年隸領軍曹仲宗伐渦陽魏遣王元昭等

來援仲宗不欲戰慶之曰魏人遠來皆已疲倦須先挫其氣與麾下五百騎擊破其前軍進據渦陽魏人犄角作十三城慶之陷其四壘九城兵甲猶盛乃陳其俘馘鼓譟從之斬獲略盡大通二年奉命送魏王顥還北擊走魏帥元天穆遂下大梁取滎陽虎牢孝莊出居河北顥乃得入洛是役也慶之兵止七千魏眾四十萬自發銍縣至洛陽凡取三十二城四十七戰所向皆克顥入宮御前殿改元大赦以慶之爲車騎大將軍顥既得志疑慶之不遣之鎮魏將爾朱榮等奉孝莊率眾百萬來攻顥敗走臨穎被擒慶之領馬步數千結陣南還封永興縣侯都督緣淮諸軍事

討斬妖賊沙門僧強屢敗魏師江湘諸州並得安久尋進
豫州刺史歲饑發粟賑救多所全活李昇等八百人求立
石頌德詔許焉卒諡曰武

節梁書參北史鄭氏通志

魚天愍隸陳慶之麾下魏北海王元顥來降武帝命慶之
送顥還北攻滎陽未拔魏將元天穆爾朱兆等率大兵來
援梁士卒皆恐慶之曰我眾止七千敵四十餘萬今日惟
有必死乃可得生當及其未盡至急取其城據之耳乃鼓
之魚天愍踰堞先登東陽宋景休繼之將士始蟻附而入
執都督楊昱天穆引兵圍城慶之及天愍力戰破之進拔

虎牢

參舊志

陳昕字君章慶之第五子七歲能騎射大同四年為邵陵
王常侍慶之在懸瓠魏驍將堯雄子寶樂自恃勇力求單
騎校戰昕躍馬直趨寶樂雄即潰散十年假節為宣猛將
軍討平妖賊王勒宗後為臨川太守大清二年侯景圍歷
陽勅召昕還昕啟云采石急須重鎮王質水軍輕弱恐虜
必濟乃拜昕為雲騎將軍代質未及下渚景已渡江戰敗
為景擒令收集部曲將任用之昕誓不從昕因說范桃棒
率所領歸降許之遂立盟遣昕夜縋而入武帝大喜事泄
昕弗之知猶依期而下景邀得之遂見害

節梁書

陳

周文育字景德少孤貧本居新安壽昌縣陽羨周蒼養爲子教以書計育曰誰能學此取富貴但有大槩耳教之騎射大悅及壯從蒼隸陳慶之麾下蒼與白水蠻戰死文育馳取其尸賊不敢逼戰凡數十合身被九創及還請葬蒼慶之壯其節厚加贈遺後從陳武帝累戰功封東遷縣侯除南豫州刺史武帝拒徐嗣徽於白城將戰風急帝曰矢不逆風育曰事迫矣何用古法抽槊陷陣殺傷數百人風亦尋轉嗣徽敗走移營幕府山加育平西將軍進爵壽昌縣公廣州刺史蕭勃舉兵叛育討平之後命爲南道都督討王琳失利遂爲豫章內史熊曇朗所害武帝聞之即日

舉哀贈侍中司空諡曰忠愍子寶安嗣

參陳書節南史

周寶安字安民年十餘歲便習騎射以貴公子驕蹇好遊逸文育爲晉陵守屢奉令征討委寶安監知郡事高祖患之及文育西征敗績繫于王琳寶安始折節讀書與士君子遊綏御士卒甚有威惠及文育見害起爲猛烈將軍領父舊兵仍令南討文帝卽位深器重之後平王琳有功周迪之破熊曇朗寶安南入窮其餘黨天嘉二年拜吳興太守襲封壽昌縣公三年征留異爲侯安都前軍異平遷左衛將軍領衛都尉卒諡曰成

節陳書

唐

衛逖少習詩書學弓劍遊并汾間遇唐神堯皇帝初建義旗以藝勇進平竇建德有功拜宿衛將軍後以母老病乞歸侍養辭意哀激詔許之以孝敬睦閨門以然諾重鄉里及卒邑人懷其賢立廟於荆溪之湄歲時祀之

本舊志

蔣儼字魯敬貞觀中擢明經第為右屯衛兵曹參軍太宗將征遼東募使高麗者人皆憚行儼曰主上雄武四夷畏威叢爾小國敢圖王人脫不幸固吾死所遂請行為莫離支所囚脇以兵不屈及高麗平得歸帝壯其節拜朝散大夫高宗朝遷蒲州刺史稱良牧永隆二年除太子右衛副率時徵隱士田游巖為太子洗馬無所匡正儼貽書責之

游巖愧不能答文明中封義興縣子歷右衛大將軍以年

老致仕垂拱三年卒年七十有八著有詹事集五卷

本舊唐書

參新唐書

薛登本名謙光父士通仕隋為鷹揚郎將江都亂與州民間人嗣安據城拒賊武德二年歸唐授東武州刺史平叛寇輔公祏封臨汾侯謙光博通文史少與徐堅劉子元齊名天授中為左補闕時選舉冒濫上疏極諫轉水部員外郎遷給事中時四夷質子在京師窺見中國法度及還並為邊害謙光謂入侍宜一切禁絕先在國者不使歸蕃則夷人保疆邊邑無患武后不能從出為常州刺史屬宣州

賊鍾大眼作亂百姓奔竄謙光嚴立守備民賴以安景雲
中擢拜御史大夫僧慧範怙太平公主勢奪民邸肆謙光
劾奏之反為主所構出為岐州刺史遷太子賓客以與太

子同名特敕賜名登卒年七十三所撰有四時記二十卷

參節唐書諫選舉疏略臣聞國以得賢為寶臣以舉士為
忠是以子皮之讓國橋鮑叔之推管仲燕昭委兵于樂毅
符堅推政于王猛昭王錫輅馬以止讒永固戮樊世以除
潛處猜嫌而益信行開毀而無疑此由識之明而察之深
也至若宰我見過於宣尼逢萌被知于文叔韓信無聞於
項氏毛遂不齒于平原此失士之故也是以人主受不肖
之士則政乖得賢良之佐則時泰則士不可不察而官不
可妄授也比來舉薦多以不才假譽馳聲互相推獎希潤
身之小計忘臣子之大猷非所以報國求賢副陛下翹翹
之望者也臣竊見古之取士實異于今先觀名行之源考
其鄉邑之譽崇禮讓以勵己明節義以標信以敦樸為先
最以雕蟲為後科眾議以定其高下郡將難誣於曲直故

可貢之賢愚卽州將之榮辱是以李陵降而隴西慙于木
隱而西河美冀缺以禮讓升朝則晉人知禮文翁以儒林
奕俗則蜀士多儒燕昭好馬則駿馬來庭葉公好龍則真
龍入室由是言之未有上之所好而下不從其化者也自
七國之季雖雜縱橫而漢代求才猶徵百行魏氏則愛放
達晉宋祗重門資有梁薦士雅愛屬詞陳氏簡賢特珍賦
咏迨至隋室餘風尚在開皇中李諤論之于文帝曰魏之
三祖更好文詞忽君人之大道好雕蟲之小技連篇累牘
不出月露之形積案盈箱盡是風雲之狀代俗以此相高
朝廷以茲擢士故文華日繁政務日亂有唐纂歷雖漸改
于故非陛下君臨思察才于其理樹本崇化惟在旌賢今
之舉人有乖事實鄉議決小人之筆行修無長者之論明
制纔出驅馳府寺之門出入王公之第上啟陳詩惟希效
唾之澤摩頂至足翼荷提攜之恩察其行而度其材則人
品于茲見矣徇己之心切則至公之理乖貪仕之性彰則
廉潔之風薄是知府命雖高異叔度勤勤之讓黃門已貴
無秦嘉耿耿之辭故選司補置諠然于禮闈州貢賓王爭
訟于階闈謗議紛合浸以成風夫競榮者必有競利之心
謙遜者亦無貪賄之名邀仕者皆戚施而附會風化之漸靡
修名若開趨競之名邀仕者皆戚施而附會風化之漸靡

不由茲祇如才應經邦之流唯令試策武能制敵之例只
 驗鸞弧若其文擅清府便充甲第藻思微滅卽便告歸以
 此收人恐乖事實何者樂廣假筆于潘岳靈運詞高于牧
 之平津文劣于長卿子建筆麗于荀彧若以射策爲最則
 潘謝曹馬必居孫樂之右若使協贊機猷則安仁靈運亦
 無裨附之益由此言之不可一概而取也至于武藝則趙
 雲雖勇資諸葛之指擣周勃雖雄乏陳平之計略若使樊
 噲居蕭何之任必失指縱之機使蕭何入戲下之軍亦無
 免主之効是以伏波聚米知隗囂之可圖陳湯屈指識烏
 孫之自解謀將不長于弓馬良相甯資于射策豈與元長
 自表妄飾詞鋒曹植題章虛藻麗校量其可否也伏願
 陛下降明制頌峻科千里一賢尚不爲少僥倖冒進須立
 隄防斷虛浮之飾詞收實用之良策不取無稽之說必求
 忠告之言文則試以効官武則令其守禦始既察言觀行
 終亦循名核實自然僥倖濫吹之伍無所藏其庸妄也其
 有文鋒挺秀武藝超絕有効伎之偏用無幹濟之大才爲
 軍鋒之爪牙作詞賦之標準自可試凌雲之策練穿札之
 工承上命而賦甘泉稟中軍而令赴敵旣有隨才之任必
 無負乘之憂臣又謹按漢法所舉之士終身保任揚雄之
 坐田儀責其冒薦成子之居魏相酌于得賢賞罰之令行

宋

蔣堂字希魯祥符五年擢進士第爲楚州團練推官歷諸
 州召爲監察御史禁中火有司請究所起多引宮人屬吏
 堂言火起無迹安知非天意也陛下宜修德應變有司迺
 欲歸咎宮人以之屬吏何求不可而遂賜之死是重天譴
 也詔原之奏郭皇后不當廢坐贖再遷侍御史出爲江南
 東路轉運使徙淮南兼江淮發運事歲薦部吏二百人或

謂有謬舉且得罪堂曰什得二三亦足報國矣歷戶部度支鹽鐵副使安撫梓夔路尋以事降知越州大濬鑑湖溉田九千頃民沾其利復爲江淮制置發運使前後五年未嘗賂遺權貴遷左司郎中知杭州以樞密直學士知益州慶歷初詔天下建學漢文翁石室在孔子廟中堂因廣其舍爲學宮選屬官以教諸生士人翕然稱之以尙書禮部侍郎致仕卒特贈吏部侍郎堂爲人清修純飭遇事毅然不屈好學工文辭著吳門集二十卷春卿遺稿一卷節宋史邵材字聖規熙甯五年試開封第一與父潛同登進士歷官監察御史郡有疑獄上刑部議當貸死用事者謂殺人

不可貸仍欲坐所奏且著令材抗論曰疑獄當貸不貸奏者反獲罪恐獄吏便文自營不復以疑獄聞矣時王安石當國惡司馬光論新法之害謂材曰劾去司馬大官可立待材毅然曰君實正人也可厚誣之乎安石艷然材嘆曰有是哉可以去矣卽自劾歸後以鴻臚卿乞祠卒本舊志

錢卽字中道熙甯九年進士授安州司理初莅事吏有誣服抵死罪卽明其寃守將欲薦之答曰治獄得情職也擠人以論功非吾志也調睦州推官有寃獄久不決部使者以宿怨授意屬往按治誘以薦剡卽折獄平反全活二十三人或誚之對曰吾甯老死選中忍以數十命易一薦哉

於清平關東西築徐丁臺韋章壩賜名曰安邊城曰歸德堡包城萬餘頃始可耕種歲收以數萬計歷鄜延環慶經略安撫使又移鄜延路經略安撫使城清遠鎮邊二寨以遏賊衝增築龍泉御謀二地保聚邊民加顯謨閣直學士政和初抗章力詆童貫貶永州團練副使後以龍圖閣學士致仕卒諡忠定楊龜山爲作墓誌銘有文集三十卷奏

議七十卷

節楊文靖公文集

蔣階字夢錫元祐三年李常甯榜進士宰執以明經薦徽宗擢爲大司樂時內侍梁師成權傾中外號爲隱相階與議樂舞不合師成怒階曰一代典禮當質諸經不顧而去

燕雲初復廷臣議上尊號階曰裕陵卻徽號爲萬世法奈

何諛悅以虧盛德出知興元府軍卒王靖作亂階擒戮之

曉諭餘黨帖伏後引疾奉祠鴻慶宮

本舊志

蔣興祖字以承之奇孫蔭任饒州司錄睦州盜起旁郡皆震興祖白州將糾吏卒緝戰具盜不敢犯以功遷知開封府陽武縣土脈脆惡大河薄其南嘗積雨汎溢隄且潰興祖躬救護露宿其上彌四旬隄得完治爲畿邑最靖康初金兵犯京師道過縣或勸使走避興祖曰吾世受國恩義當死將焉避監兵與賊通斬以徇金數百騎來攻不勝去明日師益至力不敵死焉年四十有二妻及長子俱死於

難詔贈朝散大夫諡忠愍

本宋史

周葵字立義宣和六年進士高宗朝兩為言官入臺兩月章三十上條陳時政二十餘事指宰相趙鼎不任責又論張浚北伐係國存亡廷臣謂其沮大計罷為司農少卿及秦檜獨相意葵憾趙鼎不為己用再除殿中侍御史內降差除四人葵言願陛下以仁祖為法大臣以杜衍為法又歷疏國用軍政士民三大弊檜怒轉運李椿年希檜旨劾之落職屏居鄉閭坦然安之檜死起直秘閣權禮部侍郎疏言科舉之弊御史湯鵬舉劾之復罷去孝宗即位除兵部侍郎朝議主恢復葵疏陳不可輕動忤旨及李顯忠等敗績上思其言拜參知政事臺諫交章言議和太速眾論洶洶葵即求退加資政殿大學士致仕葵平生學問不泥傳註作聖傳詩二十篇文集三十卷奏議五卷晚號惟心居士淳熙元年正月薨賜諡簡惠

節宋史

單時字行可宣和六年進士隆興初為國子監主簿遷秘書丞乾道元年擢監察御史上封事言飲酒擊毬二事孝宗喜謂輔臣曰擊毬朕放下多時飲酒朕當自戒五年春除諫議大夫上以目疾久不視朝及御殿復疏諫上面諭曰卿言可謂愛朕是冬卒上為慨惜

參舊志

蔣芾字子禮紹興二十一年進士第二人授建康府推官

秦檜欲羅置門下拒之檜怒終其世不召用孝宗卽位累遷起居郎直學士院因繳內侍梁珂勅事聞德壽宮上皇嘆其忠除簽書樞密院條奏邊防軍功甚悉一日進呈邊報上顧曰將來都督非卿不可芾奏臣未嘗經歷兵間願陛下更審思其人南郊禮畢宰相葉禹魏杞罷芾採眾論參已見爲籌邊志上之拜右僕射同中書門下平章事兼樞密使會母卒詔起復力辭上方銳意恢復芾力陳天時人事未可舉兵拂上意落職提舉洞霄宮卒著有榮敏奏

議漢史二十卷

節宋史

邵及之宣和三年進士乾道中爲司封郎時楊和王

沂中子

倖在宥府乞襲封吏部長貳欲上其事吏以牘呈及之曰國家故事異姓王無襲封者雖趙韓王開國元勳亦止及身而已斥去之尋上章告老不許請益力除直徽猷閣致仕孝宗嘉之詔輔臣舉漢公卿餞二疏故事由是朝士皆作歌詩宴餞爲一時盛觀

參舊志

吳政字宏道以薦授宣義郎知棗強安豐軍歷任興元都統嘉定十一年四月金人犯大散關守將王立遁政聞一日夜馳三百里至黃牛堡金人來犯戰卻之至大散關執王立斬以徇事聞詔進三官十二年金人復入寇政拒戰於黃牛堡兵少無援死之贈樞密使封沂國公

參節宋史甯宗本紀

吳潛字德光政之曾孫理宗紹定二年進士歷官左丞相兼樞密使時賈似道誤國潛上疏略云鄂渚被圍湖南騷動奸臣迷國諛佞成風釀成禍患為宗社憂願垂日月之明無使小人翕聚則天下幸甚不報尋罷相遠竄循州似道使武臣劉宗申開宴中毒而卒似道歸罪宗申仍許歸葬贈太子太師諡文成

姚峯參政希得子仕為知州德祐元年罷官家居宜興元兵圍常州州守趙與鑑遁王良臣等詐稱郡官以城降峯與通判陳炤都統制劉師勇等合謀起民兵復之事聞朝命為州守既而伯顏會兵圍城峯與炤劉師勇王安節固

守顏招降百端終不聽顏怒命降人王良臣等役民運土為壘併人築之日夜夾攻甚急力屈城陷峯與炤安節皆死之事聞贈峯龍圖閣待制炤直寶章閣安節承宣使文

天祥嘗作哀常州詩弔之

參節續通鑑綱目陳炤傳楊懷遠鄉評備考

莫謙之初於郡城護國寺為僧德祐元年糾合義士捍禦鄉閭詔為溧陽尉是年冬元兵陷常州謙之亦在城中率兵巷戰死詔贈武功大夫時有萬安僧亦舉義旗其詩曰時危聊作將事定復為僧以兵力寡弱旋亦戰歿

參楊懷遠鄉評

明考備

吳雲字友雲洪武初以求賢舉授宏文館校書郎出爲湖廣行省參政五年拜刑部尙書時元梁王據雲南先命王稭齋詔往遇害太祖不欲勞兵遠征八年九月再遣雲持節招撫會梁王遣鐵知院等二十餘人使漠北爲大將軍所獲械送京師太祖釋之令與雲偕行至沙塘口鐵知院等謀曰吾輩奉使被執罪且死乃說雲改制書給梁王雲不從梁王遣人來逼令胡服辮髮雲以死自誓終不屈遂被害梁王壯其節收骸骨送給孤寺殯之雲子黻貧不能歸宜興卽葬江夏金口鎮事聞補黻爲國子生宏治四年同邑徐少師溥遺書雲南巡撫王詔疏請於朝贈刑部尙

書諡忠節與王稭並祠額曰二忠正德中本邑奉部文祀

雲於衛將軍祠額亦曰二忠潘子安謝遷冷宗元王鏊諸名人多有輓章同邑吳尙書儼編次成帙付之梓名曰忠

節錄雲撰有天文雜志占一卷

參徐溥忠節錄序節李東陽後序

徐溥字時用祖鑑瓊州知府多惠政溥成童時塾師窺其袖中有小冊出之乃彙古聖賢省身克己語大驚異之景泰五年進士第廷試第二人授編修孝宗嗣位歷官文淵閣大學士禮部尙書三主會試王鏊趙寬錢福皆出其門得人稱最宏治五年爲首輔與劉健李東陽謝遷等協心輔治事有不可輒共爭之八年占城奏安南侵其邊帝欲

遣大臣往責之溥言外國相侵有司檄諭之足矣遣使往問萬一抗令虧損國體問罪興師後患滋大於是罷不遣十二月詔撰三清樂章溥言三清乃道家妄說臣等誦讀儒書不敢以非道事陛下帝嘉納之欽天監正李華不職罷忽傳旨復官溥言大小陞除皆出題擬別無內降若傳帖一行倖門遂啟不敢奉詔知州劉遜以事忤岷王王訐奏之逮詔獄科臣交章論救上怒并逮繫之賴溥力爭俱得釋中官李廣以燒煉齋醮被寵十年二月溥等上疏極論其邪妄帝感其言疏李廣後竟誅之尋以災異求直言廷臣所上封事經月不報而諫官論救何鼎忤旨待罪者

久溥等皆以為言於是悉下諸章諸諫官弗問十一年皇太子出閣加少師兼太子太師進華蓋殿大學士以目疾乞歸帝眷留久之乃許踰年卒贈太師諡文靖溥性凝重有度在內閣十二年因事納忠隨材器使屢遇大獄保全善類甚眾承劉吉作威福之後鎮以安靜中外咸甯共推其休休有度焉性至孝嘗再廬墓有白鳩白雁之祥自奉至儉而好施與嘗慕范文正置義田贍族請之朝帝優詔許之復其徭役所著有謙齋集行世

參節明史 辭撰二

天地夫天尊無對故禮以少為貴祭不過南郊時不過孟春牲不過特牛漢祀五帝儒者非之況三清乃邪妄之說謂一天之上有三大帝乃以李聃居其一是以人鬼列于天神非禮也至于郊祀樂章皇祖舊制今所傳樂章雖

載永樂大典是書博採不精不足以黷典禮臣誦習儒書
若邪說俚曲尤所不習且初設文淵閣命學士居之者實
欲謀議政事講論經史培養本源弼正闕失非欲其阿諛
順旨以取容悅也 論燒煉齋醮疏曰祖宗自洪武至天
順日講成就君德裨益治道今每歲進講不過數日夫八
君之心必有所繫不繫于此必繫於彼正士既疏則邪說
乘閒而入近有以齋醮燒煉進者此乃異端惑世之術聖
王之所必禁也宋徽宗崇道流卒使乘輿播遷社稷傾覆
至若燒煉其禍尤慘金石之藥性多酷烈一入腸腑為禍
百端唐憲宗藥發致疾雖殺方士柳泌竟亦何益今上清
龍虎宮神樂祖師殿及番經廠皆焚燬無遺神如有靈何
不自保天厭其穢亦已明甚昔李絳有言憂先于事可以
無憂事至而憂無益于事矧熒惑失度太陽無光天鳴地
震草妖木異四方奏報殆無虛日伏望嚴早朝之節復奏
事之規勤講學之功優接下之禮遠邪妄之人斥誣罔之
說太平之業可保矣 程敏政義塾記大學士徐公世居
常之宜興族甚鉅而收族之法則自其先大夫啟之未成
也公既貴乃撥已田千畝以贍其婚喪服食之費曰義莊
又以為養之不可無教也爰置學一區曰義塾歲延有學

行者一人為師凡族之來學者咸取給義莊且具條約以
聞聖天子嘉予之而下有司加維護焉公以義塾者風教
所繫不可無紀屬筆于不佞弗敢辭則述所問以對曰古
君子之學必自家始而後可推之天下其教有章其施有
等然其學也豈自他求而後得哉尊吾之德性而輔之問
學使智長心成行與言副薰然禮義之域而悖親傲長之
風無自生焉於是徵之百聖而合放之四海而準此三代
之遺法也秦漢以來去古遠矣學不足於自修士非出于
里選求治之隆安所得乎公歷事四朝及今青宮凡三任
輔導為師臣其所以沃上心正王度式是百辟表儀當世
者天下誦之矣又本先志捐所有以贍族推教之所始以
永淑其後人其心公矣其善之所被廣矣昔文正范公之
置義田也百世尚之而義學無所聞何哉蓋嘗考之當宋
盛時學校之在郡邑者且未有定議況其家也我高廟革
前元之陋而建學育才取法殷周列聖相承講求益備百
餘年矣故公得以論道之暇經畫家政而為文正公之所
未遑者豈非文運亨嘉之盛亦有公之所際會而然哉凡為公
之子弟族人者誦詩習禮于此體公之心而服其訓盡其
學力之所及處為良士出為貞臣以古君子自勵使安于
參養而蹈其身慎其家者聞風而慚撫事而悔求自列于

義塾不可得其有繫風教豈獨一家之重輕而已哉義莊
 事當別有書茲不贅王問議保義莊記宜興徐氏義莊
 自少師大學士文靖公始也文靖舉進士第二人致身相
 位當孝宗時君臣同德經畫廟謨多培養國家人氣稱太
 平宰相嘗推廣先柱國漁隱公德意置義田千百餘畝贖
 族人而收之如范文正公遺法參酌前規列為條約請上
 命下戶部著籍仍令有司免其徭役嚴為防護緣長子元
 楷已掌祀事乃委次子元相領其事以彰文靖公承先
 德之仁昭朝廷敦崇風化之義蓋偉典也惟時徐氏食指
 尙微以昭朝廷敦崇風化之義蓋偉典也惟時徐氏食指
 費照條約給散外充然取足一稔而有餘迄今百年來
 食指總總數倍疇昔嫁者娶者喪者葬者待以舉火者弗
 啻百十餘人雲谷翁子長史公文輝於嘉靖壬戌代長兄
 而與則其惠勿周苟不稍為損益將來日復一日入不敷
 出孰肯主之必不贍矣君恩祖德不能保其不墮惡在其
 為孫也不得已羣宗人折衷而類削之嫁娶喪葬及應舉
 者視昔減三之一待以舉火者亦時稽其駿奔恪情而予
 奪之族之人囂然稱不便公毅然執之不撓上其議于撫
 臺周觀所公牘曰徐氏義莊條約少師題奉欽依所以睦

族裕後者周矣傳遠族繁人眾弊起因時酌裁以翼世規
 自不容已者今本宦所議事宜見奉先裕後之圖真仁人
 孝子之用心也允其議下有司立石無何龍潭公于隆慶
 庚午卒徐之宗人難乎其繼文靖公孫文燧等會諸合族
 僉謂龍潭公中翰君乃請邑侯徐見吾公樹碑竣勒石於
 代主莊事公損益變通之制昭示不朽文靖公光前裕後之
 是龍潭公損益變通之制昭示不朽文靖公光前裕後之
 規垂之可久義莊其永保矣中翰君以義莊原存錄乃翁
 此舉不可無紀也介其懿親周友樵及子門人葉鳴和乞
 予記以傳其事予惟惠恤不賈存乎仁裁制合宜存乎義
 酌盈濟虛者通其法補偏救弊者因其時法不可以固不
 得不救之以時仁有時而窮不得不裁之以義義裁仁故
 不匱也時救法故可通也仁不匱法可通族故可睦也昔
 先王以禮之薄厚與年之上下而制其節曰禮時為大易
 於損日損益盈虛與時偕行於頤於旅於隨於豫皆曰時
 義大矣哉頤養也旅眾也養之也眾則於時損之是隨道
 也隨時損益則惠周而澤不竭行之萬世可無敝是豫道
 也是舉也備易之時義而合乎禮可以書矣昔范文正公
 義莊歷五六百年至今猶存者以子若孫忠宣正平二公
 斟酌裁益得其宜也今長史公之議行中翰君之立石即

忠宣正平之用意也于義莊豈小補哉子素嘉龍潭公喬梓之高義因其請遂書始末詔徐氏仁人孝子繹思其義俾善繼述而仁義並行用培一家元氣求與文正公者共永傳于世則余言亦當與太保守溪王公保義堂記並傳不朽竊有幸云

吳儼字克温成化二十二年舉於鄉聯雋成進士授編修歷遷侍講學士正德初召修孝宗實錄直講筵劉瑾竊柄欲羅致之罔以美官儼峻拒之瑾怒會大計羣吏罷儼官瑾誅復職陞南京禮部尚書十二年武宗北幸宣大儼抗疏切諫明年復偕諸大臣上疏曰臣等初聞駕幸昌平曾具疏極論不蒙採納既聞出居庸幸宣大宰輔不及知羣臣不及從三軍之士不及衛京師内外人心動搖徐淮以南

南饑荒千里民無衣食安保其不為盜所禦之寇尙遠隔陰山而不虞之禍或猝起于肘腋臣所大懼也不報十四年卒於官贈太子少保謚文肅著有忠節錄孝宗實錄摘稿四卷節明史

吳玘由吏員任贛縣主簿正德十一年南中盜賊蜂起橫水賊謝志山合樂昌賊高快馬掠大庾攻南康郡玘率兵討之力戰死督師陽明王公以其事聞詔贈贛縣知縣錄一子入監授南城縣主簿參唐鶴徵府志節明史王守仁傳

萬士和字思節嘉靖二十年進士授庶吉士三年解館嚴嵩惡其不識面抑之得禮部主事督貴州學政率厲諸生

課以文學一變其武悍之俗累遷湖廣參政撫納叛苗二十八砦以功資銀幣時三殿工興採木使者旁午士和經畫備至辰沅之民賴以休息擢江西按察使嚴嵩劾罷之嵩敗起山東左布政使政事故專決于左士和曰朝廷設二使如右手非有軒輊乃約右使分日治事再遷右副都御史督南京糧儲奏請便民六事勒石漕次使知歲解費額軍民便之隆慶初進戶部侍郎與高拱有隙引疾歸萬曆元年陸樹聲去位張居正欲收士譽召爲禮部侍郎條上崇儉數事又以災祲屢見奏乞杜倖門容慝直汰冗員抑干請語多不避時忌俺答及所部貢馬邊臣請加官

賞士和言賞有成額毋徇額外請從之方士倚馮保求官張居正納其賂引爲內援士和持不可成國公朱希忠歿居正許贈王爵士和又力爭之給事中余懋學言事得罪士和言直臣不當斥於是積忤居正給事中朱南雍承風劾之遂謝病歸居正歿起南京禮部尙書再疏引年不赴士和生平承父吉家學又從唐荆川遊講求義利之辨甚悉嘗言吾爲兩司始知實心任事卽是真才吾仕廣一介不妄取始識得一廉字其論學以誠爲宗以靜爲鍵以躬行爲實地意主于篤信朱子雖不以王氏之學爲非而終以爲有弊林居十餘年時與一二知舊徜徉山水晤對一

室皆悠然自適其適也所著有履庵文集若干卷卒年七

十一贈太子少保諡文恭

明史 吳達可祠堂碑記履庵先生之歿也朝命諡之輿論歸

之吾鄉薰德而型範者咸謂不可以無祀而一時後學及門下士如俞君霑于君文熙唐君鶴徵願君憲成允成湯君鍾壽路君雲龍薛君敷教蔣君應震王君彞敘史君孟麟張君納陛于督學使者詹公侍講陳公子貞僉以為當適龍等屢請于督學使者詹公侍講陳公子貞僉以為當適江右劉公應麒巡撫江南以請告待命吾邑公故先生南宮司屬知德最真乃指俸首倡且顏其扁曰昭代醇儒而督撫趙公可懷繼之亦慨然下憲檄捐資協濟越載而工成堂庶門宇煥然新矣余小子敢不揣蕪陋而為之記曰吾徒今日祀先生之意豈徒一邑之美觀已哉蓋嘗邇道脈之淵源與學術之離合而祀典所係蓋甚重也古今論道學之宗尼父其準矣尼父由志學而立而不惑而知命及耳順從心猶以不踰矩終焉聖人睿智何難超悟而必假積漸存兢惕若是蓋修不離悟悟不離修而悟到後猶日兢兢所以為聖學全功也孔門惟篤實曾子得唯一貫之傳而濂洛一派言人人殊總不越誠敬踐履二語云耳

道之訓視身以孝弟忠信莅官廉靖節義循循修行以為道矣自姚江陽明氏出倡為良知緒論一掃支離超悟本體不思善不思惡之旨以恣肆其行而猶號于人曰吾誠有萬鍾何加之心而何害于取吾誠有浮雲富貴之心而何害于通夫悟心之說本以救着迹者之弊而樊滋甚焉此支則非藥之悞而所為藥者悞也先生以古齋公為父蹈繩踐墨一本程朱師事荆川氏討論心體期于無欲自得一任天機之寂感觀所敘陽明錄言及從祀疏議良知之學蓋亦確信不疑者然其飭躬範俗以名檢為尚故辭受取子出處進退靡不以道合真窺先生之意若謂迹之辨幾微最難學者未覩聖學之全甯守尺寸而不逾無甯任心而越矩守尺寸而不逾者不失為敦行之士任心而越矩者將曠逸無所不至矣可自蚤歲卒業師門許其志之樸真慮其資之柔脆晨夕提誨諄諄于變化氣質擔當負荷之大旨而小心畏慎染疾日深回首當年負愧師教多矣獨愧夫俗弊風靡機鋒競起談道德者類駕言于悟性脫略于躬修而聖學真詮祇為聽慧無忌者之藉口乃知



重刊寶鼎集卷八
先生恂恂矩矱信近世士人對症之藥石哉僉謂子之言
所以遵師訓亦所以明道術也請勒之珉石以垂諸永永
是爲
記

吳達可字叔行萬曆五年進士歷知會稽上高豐城諸縣
考最擢御史疏請神宗御經筵勤學問與大臣臺諫面議
政務又請因始和布令舉皇子冊立冠婚禮又請撤礦稅
中使不報視鹽長蘆稅使馬堂張日華議加鹽稅達可抗
疏爭事得已按直隸歲祲繪上饑民十四圖力請賑貸存
活無算改按江西稅使潘相毆折輔國將軍謀圯肢並繫
宗人宗達誣以劫課劾上饒知縣李鴻主使帝切責將軍
謀圯奪鴻官達可言宗人無故受刑又重之以詰責將使

天潢人必自危鴻無辜不當黜願亟正相罪弗聽又言遼
東高淮陝西梁永山東陳增廣東李鳳雲南楊榮皆元惡
爲民害不可一日畱又弗聽相又請開廣信銅塘山採取
大木鑿泰和斌姥山石膏達可復極諫閣臣亦爭之乃寢
還掌河南道事痛規首輔沈一貫疏畱中累遷通政使鎮
撫史晉以罪罷妄投封章詆朝相達可封其疏劾之又奏
請正疏式屏讒邪重駁正懲奸宄數事帝嘉納焉有棍弁
密書告變事關東宮達可疏請情詞剴切竟回上意東宮
由是得安尋上疏乞休卒贈右副都御史達可弱冠卽究
心理學受業萬文恭周訥溪有必爲聖賢之志其學端本

程朱更宗陽明謂良知一脈誠千聖滴髓所著有諸儒語
要日省編安節奏疏遺稿荆南漫稿諸書行世子正志進
士孫洪亮洪裕舉人洪昌進士曾孫貞吉舉人貞度進士

元孫元臣進士五世科甲蟬聯人以為德業之報云

及徐志勸學疏略題為歲序更始聖治宜新懇乞聖明勤
政學以養君德以隆治安事臣竊惟國家之理亂起于君
心君心之出入係于所養學所以培養君心而賢人君子
則固講明正學而惟持此心不可有一日之間斷者也我
皇上即位以來以三六九日為臨御之期餘為日講期輔
臣侍側儒臣進講論經史寒暑不廢勤于學矣近觀皇上
御朝視事未明而興郊廟必親虔誠祇肅一念地方災荒
則遣部臣賑恤一念京軍苦寒則發帑金賚賜德意所敷
羣情歡洽勤于政矣夫政與學非有二也必學之功純而
後政之用善一日廢學是一日荒政也經筵大典舉于春
秋而時舉時輟所賴以啟沃君心使無間斷者惟是日講
耳乃自去冬以來聖體違和御講希少臣備員侍從願効

涓埃久矣以時方沍寒調攝宜慎未敢以請今聖體既康
方春和煦可不亟為講學親賢計乎且人之精神不著于
經史則著于玩好人之學問不日進則日退未有一無所
著而亦無所進退者也故日新又新日就月將古聖賢于
學且不廢焉我祖宗朝歷聖相承英君誼辟豈少于學哉
然禮賢有館宏文有館日召文學諸臣講論經理不輟蓋
不以已修者自足而以未至者自斂未嘗一日不勤于學
也皇上天縱聰明儒臣講習已久聖學固淵且邃矣一有
閒斷安保其不他有所著乎又安保其進而退乎微臣
一念倦倦實有不容自已者請自今伊始經筵照舊舉行
外每旬日內以三日御朝餘日侍講燕閒溫習經史無間
寒暑無分朝夕凡帝王之大經大法必反而求之身心遇
災而撤樂減膳不徒賑給已也禱祀而秉志齋心不徒遣
祭已也凡此皆學之實可以養君德亦可以保聖功者也
至于召對之典屢經諸臣疏請未見舉行意者皇上以事
機未徹恐綸音之發難于悉中乎意者以諸臣聞見未周
恐玉音之降難于登對乎臣以為此不必慮也召對原為
商榷國事而設非必其言之一發即中唐虞諸臣有都俞
亦有吁咈期于共濟國事而已今廷臣中豈無曉暢事機
通達國體者乎我皇上于日講之下輔臣見在即將本日

章奏面商可否經筵之暇部院大臣及科道官見在即將各衙門事宜面議從違倘聖心有疑不妨反覆問辨倘聖體稍倦不妨暫息再興略儀文之末窮理道之原援古證今必求至當將見義理講習則明治體講求則定不必更舉召對之儀而君臣道合上下心孚紛紜異同之論漸歸于一偏黨好惡之私悉化于中矣太和之氣蒸徹宇宙尙何災變之不弭乎

史孟麟字際明萬曆十一年進士授庶吉士改吏科給事中疏劾少詹事黃洪憲典試作奸左都御史吳時來沮抑言路執政庇之格不行員外郎趙南星主事姜士昌相繼劾兩人吏科都給事陳與郊素附執政屬同官李春開疏許南星士昌妄言孟麟亦上疏攻春開因求罷不許竟自引歸尋召爲兵科右給事中二十年大學士趙志皋張位

言凡會議會推並令廷臣類奏取自上裁用杜專權孟麟疏爭之忤旨不納再遷吏科都給事中三王並封議起盈廷詆王錫爵孟麟別白尤力略云有嫡立嫡無嫡立長東宮無待嫡之條元子無並封之例又云中宮有子則已子爲嫡無子則凡子皆子而長子爲嫡條議詳切上意遂回而並封之論不行南星以讒言斥孟麟亦引疾歸家居十五年與東林講會時望益重召起故官督四夷館會觀挺擊事疏請冊立皇太孫絕羣小覬覦且救御史劉光復帝怒謫兩浙鹽運判官熹宗立稍遷南京禮部主事累擢太僕卿卒所著有春王正月辨沈龍岡先生言行錄明道附

言二卷玉池疏稿一卷亦為堂集

節明史 爭會議疏略

閣臣侵部院之權言路希閣臣之旨官失其守言失其責久矣陛下更置輔臣與天下更始政事歸六部公事付言官天下方欣欣望治奈何忽有此令曩太祖罷中書省分設六部恐其專也而官各有職不相侵越則又惟恐其不專蓋以一事任一官則專不為害即使敗事亦罪有所歸此祖宗建官之意也今令諸臣各書所見類奏以聽上裁則始以一部之事分而散之于諸司究以諸司之權合而收之于禁密事雖上裁旨由閣擬脫有私意奸其間內託上旨外委廷言誰執其咎又脫有馮保張居正者夤緣為奸授意外廷小人趨承扶同罔上朝廷不得察其非當官不能爭其事又誰執其咎臣竊謂政權分之六部不可以為專惟六部不專則必有專之者是乃收攬威權之漸必從也

吳正志字子矩通政使達可子幼承家訓講學東林萬曆十七年進士授刑部主事政府私人李春開以出位糾趙

南星姜士昌都給事陳與郊實主之正志以為大臣不職賴有諫官諫官不職則司屬當言乃上疏劾李春開陳與郊黨護大臣請加究治御史赫瀛集諸御史議合疏糾正志萬國欽周孔教不署名瀛大恚讓之國欽曰冠豸冠服豸服乃日以保留大臣傾善類為事我不能苟同瀛氣奪疏不果上而正志已奉嚴旨切責將廷杖乃席藁待命或勸備黑羊皮以防腐潰正志不可曰如此是畏死矣閣臣申時行解救謫宜君典史直聲震天下稍遷饒州推官召為光祿寺寺丞出為江西湖西道僉事予告歸是時吏部推升希執政之旨痛抑謫官復上書申時行望以文彥博

薦起唐介故事識者避之所著有泉上語錄雲起樓詩文

集參節明史參李春開疏略為言官受旨黨護大臣排

按吏科給事中李春開本以狎邪小人鑽刺資緣得據言

路受官之日即疏詆員外趙南星一時人情洶洶有竊笑

之者有唾罵之者臣時亦扼腕不平欲一言以折其非第

念其新進無知未即指參使春開而稍知人閒有羞恥事

當杜門匿影掩面漸舌悔過不暇矣孰意喋喋利口再疏

攻擊南星及戶部郎中姜士昌乎臣姑不暇計其醜顏蔑

恥之狀舉其最為世道人心害者夫南星士昌疏中所指

不止一二官邪已也大都日擊吏治民生之蠹而欲去其

太甚者耳非漫為無當之說以自托于鳴鳳之列也今春

開徒銜其疏稱非怯于吳時來詹仰庇之糾正也諸臣或

吳中行之批鱗非怯于吳時來詹仰庇之糾正也諸臣或

留滯周南或偃蹇林壑其氣力又非熾于如炎之總憲也

言者何罪稱者何援徒以正士日就危疑位不能究其才

賞不足酬其節舉世所敢怒不敢言者一白寃抑耳奈何

談及改節之重臣則目之為傾陷談及遠棄之孤臣則目

之為比周豈威福足以制人者反不樂附而為當世所厭

逐者願欲藉之以致青雲耶臣不知其解也且朝廷所與

共治天下者在一二大臣大臣有所顧忌而不敢欺罔者

在二三言官辟如股肱耳目交相為用而司屬則所為手

持足行補耳目之不逮者也今大臣不得其職而諫官不

言諫官不言而反歧官守言責為二途欲禁司屬之不言

股肱之寄已折耳目之寄已窮而又繫縛其手足令一無

所措而後已人身如此幾何不仆國體如此幾何不隳也

臣無論古者懸敢諫之旌立誹謗之木即如我朝有上言

論而戶曉者今春開但疏保畱御史陳汴林祖述等同聲

和之一時臺諫諸臣業已干上言德政之禁矣而又欲禁

司屬之直言無隱夫天下士顧可盡箱其口耶以臣觀之

遞年以來言者固不乏人而詆之者不以為出位即以爲

沽名不以爲求勝即以為報復纔一啟吻輒加之罪謫而

又嚴諭堂官各悉所司何者天下本無事小人自擾之心

未已羣工之議未息也何者天下雖欲一日享安靜和平之福

人不可得已然今之所去小人雖欲一日享安靜和平之福

勢如疽毒之類必至于決裂潰散而後為快也猶若人身

積汗稍自拭濯則宿垢悉除頓還舊觀其勢固甚輕而其

事亦無難也。上申相國書略正志從苦塊間竊窺邸報。吏部為推陞萬劍州一事致激上怒。選司盡削籍為民。志不勝惶顧。駭愕復不自揆。度願因事而効忠焉。夫萬劍州之被謫。不過為向者得罪于相公耳。非嘗有批鱗之罪。投明主之忌也。間關險道。業已兩年。其應量移與否。志誠不。宜越俎稱說。以冒植黨。希進之嫌。但此舉雖係皇上睿斷。然必有為相公調停于左右。而不樂翻然改革者。夫相公。十餘年來。為相公調停于左右。而不樂翻然改革者。夫相公。下人心之望者。賴有此耳。方萬侍御抗疏時。相公尚在中。書此時不欲甘心。而乃于解政之後。藏怒蓄怨。陰錮之。使不得庸乎。又況舉朝廷之法。用朝廷之人。至公無私。賢愚。僉悅。顧欲株連蔓及。繫主爵者。之手。足使不獲用于朝。終。轉一卑官。無辜被逮。一網無餘。如是而後。足以快當事之。憤。箝天下之舌乎。志以為必不其然。第有一言之獻者。黜。陟者。朝廷之黜陟也。而所以致朝廷之黜逐。言官者。則相。公不得而辭其責也。相公既不能申救于曩時。使御史得。申敢言之氣。猶當轉移于今日。使吏部得行善善之公。如。宋朝唐介。極言詆文彥博。初謫英州。別駕彥博。後登相位。卒言于上。起為參政。尋至大用。至于壯唐介者。未有不。多。潞公方茲。皇上眷注。相公未必減于執政之日。而相公之。

自待奈何。出彥博下。哉相公誠以此時力言。勸諍俾皇上。無以輔弼舊臣之故。含怒于言官。又無以舉用言官之故。遷怒于銓部。事濟則皇上之量。合乎覆載。相公之心。光乎。日月。不濟亦使天下後世。曉然知今日此舉。相公真無所。芥蒂於其間。以此昭明。注度而贊揚。盛治豈不快哉。至。立大典。雖日屢旨。分明。然言官職掌所關。乘時建白。非。上干出位之禁也。皇上威嚴之下。斥逐不已。而至于削籍。削籍不已。而至于廷杖。諫垣為之幾空。朝廷為之股慄。傳。之中。外騷動。一時之人心。垂諸史冊。虧損聖明之盛德。說。者咸謂相公不在中書。密勿之上。或無人委曲調護。以。至。聖明憤激。而莫解國事。決裂而難收。事勢紛紜。一至于此。然相公昔嘗以此冒不韙。去矣。及今不以大計反覆開諭。徐寬上怒。召還鍾羽正。諸人置之。諫職則羅大銓疏中。諸。事幾終。不自相公之心。迹將何辭于天下萬世之口乎。

張納陛字以登。萬曆十七年進士。授刑部主事。改禮部。三。王並封制。下偕同官。願允成。工部主事岳元聲合疏爭之。復昌議于同曹郎。詣各部堂。懇疏由是並封事。寢皇長子。

出閣讀書未幾吏部尚書孫鑰等以拾遺事被責允成謂閣臣張位實為之上疏力詆位納陛亦抗章極論并侵附執政者帝怒謫判鄧州告假歸初王畿講學荆溪納陛年十六從之遊至是潛心理學與東林顧憲成高攀龍同邑吳正志史孟麟等為執友講學吳中東南人士爭赴之所著有雲聲閣集易學飲河八卷疏稿續抄二卷書畫皆精絕卒時書知死知生何畏何懼八字斂手肅然而逝天啟

中贈光祿寺少卿節明史顧允成傳

湯北京字伯閱萬曆二十年進士除豐城知縣密擒巨盜范紹九積患以平治最徵授御史連劾禮部侍郎朱國祚

薊遼總督萬世德帝不問巡視西城貴妃宮豎途辱侍郎敖文禎兆京彈劾杖配之因星變抗疏極言時事詞旨激切上優答之時礦稅繁興奸人競言利帝意向之兆京偕同官金忠士等交章力諫不報出按宣府大同請罷稅使張暕礦使王虎王忠亦不納掌河南道佐孫丕揚典京察所譴黜皆當而被黜諸黨爭相攻擊兆京亦疏辨之其詞直卒無以奪也順天諸府守陵中官李浚等誣陷軍民逮繫無虛日兆京按奏被繫者悉縱遣之東廠太監盧受縱其下橫都市兆京論如法嘗監斬建言御史曹學程抗疏救之僧達觀以佛法煽動公卿惑及宮禁兆京執而杖之

會掌京察羅列湯賓尹狼戾狀黜之天下稱快力請福王之國寢奪嫡謀兆京凡三奉使多所建明後以論太宰趙煥擅權忤旨奪俸拜疏掛冠歸卒年五十二天啟中贈太

僕少卿著有靈護閣文集

節明史 告朝野同憂 異星疏題為異星屢

危以圖修改事臣聞變不虛生占無不應惟明主遇災思懼故能轉禍為祥但其修禳實政則必有獨觀時急咸與惟新者年來災祲頻仍惟星變為最大當今批政非一惟礦稅為至極洪範曰庶民惟星變為最大當今批政非一惟其所占書曰飛星如瓮則謀事起白氣曲環者斬奪爵位色赤照地者所往有兵頃者大小眾星流移人謂兵舉民離之象臣已不勝寒心乃今福建撫臣朱運昌所奏八月長星之異頭尾紅白異色體勢彎環飛動九月紅星之異自一而五三合三離光如血巨如羅則又不止如食而所謂白氣曲環色赤照地者不有合耶臣每讀史憶有所謂長星者矣又有所謂天星散落如雨者矣若乃紅色開合之變則寡聞淺見實所未經其應將安歸乎且南京十月

有流星燭地及光散為七道者與天鼓之鳴同時並見孝陵無故延燒十餘丈夫兩京重地入闕退邦數旬之內萬里之外何以各有咎徵又何不謀而合意者權政亟行四海毒痛根本無磐石之固故高廟神靈特來譴告而張疑諸奸機易山之奏詭謀尤巨測厥占為獨異與礦稅之事自大臣以至小臣言之礦稅之害自縉紳以至童孺知之何俟臣言但臣莊誦皇上稍俟充盈之旨而不能無疑且懼也竊思皇上所謂充盈果有何界限待皇上自謂充盈而礦稅恐無俟皇上停止矣何者財用在國家猶血液在人身若使竭四肢之血液盡取而注之心腹之間則四肢固將枯槁而痿痺心腹亦能無潰悶而決裂古稱泉貨義取流通罔帶亦號錢神勢無久聚不散善散之則為鉅橋之粟不善散之則為大盈之藏由我散則足收人心而固國脈由彼散適以藉寇兵而資盜糧皇上憂其難聚臣乃憂其難散也顧內帑之積且無論先朝即皇上三十年來亦幾鉅萬今度支竭矣將作水衡困矣甚則大庖不繼矣此財將安歸乎自礦稅行而商竈交困則鹽法病商旅不行則關譏病大司農國課日虧之疏言實事皇上以為天下有神輸之術耶九邊年例毫髮難虧今歲幸借馬價以支吾而馬價亦空矣明歲之計又在目前將無有脫中

忠義

三

之虞耶天地生財止有此數人之好利誰不如我人窮則亂獸窮則攫有司籠絡有時而盡今者民窮至極矣異星之告臣實凜凜焉皇上英姿負絕千古每經獨斷必越眾思礦稅之事亦願皇上之一斷而已臣敢遇變陳言伏冀聖明畏天以察宗社幸甚四海幸甚

陳于廷字孟諤萬曆二十三年進士歷知光山唐山秀水三縣徵授御史卽論救給事中汪若霖詆大學士朱賡甚力坐奪俸一年頃之劾職方郎中申用懋趙拱極黃克謙爲宰相私人不宜處要地又劾朱賡及王錫爵當斥論德顧天峻素干清議不宜久玷詞林語皆峻切視離河東劾稅使張忠撓鹽政正陽門災極陳時政闕失父喪服除起按江西劾湖口稅使潘相罪光宗立擢太常卿議紅丸事

極言崔文昇李可灼當斬尙書王紀被斥特疏申救累進吏部左侍郎天啟四年尙書趙南星譴罷大學士魏廣微希魏忠賢指欲用其私人于廷署事持不可薦喬允升馮從吾汪應蛟忠賢大怒謂所推仍南星遺黨矯旨切責并楊漣左光斗盡斥爲民出國門賦詩示同寮曰脂韋世所同侃直性所獨忠賢遣騎四偵于廷行李蕭然無所得崇禎初起南京右都御史差竣召拜左都御史以巡方責重列上糾大吏薦人才修荒政覈屯鹽禁耗羨清獄囚訪奸豪弭寇盜八事優詔褒納秩滿加太子少保三疏乞休不允壬申八月御史祝徽畢佐周以咎武弁失上旨下都御

史議于廷謂天下將驕卒惰又摧挫法吏以長其焰恐成尾大之勢不肯罪御史凡五宣諭五不奉詔竟削籍歸家居二年卒福王時贈少保諡端毅著有定軒存稿三卷疏

稿一卷參節明史

蔣允儀字聞韶萬曆四十四年進士授桐鄉知縣移嘉興嘉賦役煩重建均田均役議上之當事皆報可民困大甦天啟二年擢御史時廣甯已失熊廷弼王化貞俱論死而兵部尙書張鶴鳴如故允儀不平疏其同罪異罰因言近日言官稍進苦口輒見齟齬使諸臣不遵明諭而引裾折檻以甘斥逐天下事猶可爲也使果遵明諭而箝口結舌

天下事尙忍言哉帝不用會議紅丸事力詆方從哲請盡奪官階祿蔭又疏論四川監司周著林宰徐如珂等功請優敘而劾總督張我續退縮請罷斥俱不從踰月請杜傳宣慎爵賞免立枷除苛政且言向者丁巳之察凡抗論國本繫籍正人者莫不巧加羅織陰邪盛而陽氣衰致有今日之禍疏入魏忠賢劉朝輩皆不悅將加重譴以大學士葉向高言停俸半載已復因災禋上言內降當停內操當罷陵工束手非所以展孝思直臣久廢非所以光聖德東南杼軸已空重以屢次之加派金吾冒濫已極加以非分之襲封區區修禳虛文安能上格蒼穹哉帝不能用巡按

陝西條上籌邊八事因言近因東事日急舉中國之全力
赴之秦中稍遠便若痛癢不相關不知彼中軍士獨能枵
腹荷戈否沿邊一帶赤地千里嗟此子遺何以糊口若不
急加休養而復輕言征調是速之亂也帝不從其言卒召
張李諸賊之禍五年還朝與左都御史王紹徽不洽紹徽
魏奄黨也卽出爲湖廣副使其冬又使給事中蘇兆先劾
爲門戶渠魁遂削籍崇禎元年以薦起御史抗言奸黨王
紹徽勦點將錄獻之逆奄清流遂芟刈無遺乞加削奪爲
傾陷忠良之戒從之二年春管理京察疏陳計吏八則得
旨務一一著實舉行仕路一清尋擢太僕少卿四年六月

以右僉都御史撫治鄖陽六年流賊大至兵少不能禦上
章乞援且請罪中官陳大金與左良玉來援多攜婦女副
使徐景麟疑爲賊礮擊之士馬多死大金怒訴諸朝命逮
景麟并允儀下獄戍邊而以盧象昇代十五年御史楊爾
銘給事中倪仁禎相繼論薦未及用而卒著有撫鄖疏草

澹香園文集

節明史

何士晉字武義父其孝得士晉晚族子利其貲結土豪黃
姓與之爲難毆之死貲產盡爲掠賣繼母吳氏匿士晉外
家讀書稍懈輒示以父血衣士晉感勵與人言未嘗有笑
容萬曆二十六年舉進士持血衣愬之官罪人皆抵法初

授甯波推官莅講鄉約手演六條比以律例傳以報應使
 聞者警發報最擢工科給事中遇事敢言劾左都督王之
 禎久掌錦衣為內閣爪牙中樞心腹又劾大學士王錫爵
 逢君賊善召命宜停戶部尚書趙世卿誤國無大臣體四
 十三年有張差梃擊事中外咸疑謀出鄭國泰國泰懼出
 揭自明士晉抗疏即據揭參駁情詞激切神宗率太子長
 孫臨御慈甯宮門召文武百官面諭有何疑忌等語未幾
 出士晉為浙江僉事光宗立擢尚寶司卿遷太僕卿天啟
 二年以右僉都御史巡撫廣西安南人犯督將吏屢擊卻
 之四年拜兵部右侍郎總督兩廣軍務五年四月魏忠賢

大熾爭挺擊者率獲罪御史田景新希旨誣叛臣安邦彥
 賄士晉十萬金阻援兵遂除名徵賄助餉士晉憤鬱而卒
 有司徵賍急家人但輸數百金產已罄會莊烈帝立獲免

復官賜卹著有禮摘要厥庫須知十二卷疏稿一卷

明史 參鄭國泰疏略竊惟逆犯張差震驚儲蹕謀危宗
 社經刑部審供口詞鑿鑿在案乃會勘之請期踰五日臺
 省公疏一概畱中陛下之與東宮情親父子勢共安危豈
 有禍逼蕭牆不少動念者近因戚臣鄭國泰一揭人遂疑
 陛下有偏護而故意遲迴竊查陸大受疏內原未嘗實指
 國泰為主謀況此時張差之口供未具刑曹之勘疏未成
 國泰豈不能從容少待何故心虛膽戰輒爾具揭且既欲
 自明則宜請之皇上將張差所供內官龐保劉成等立赴
 三法司拷訊誰為主謀誰為助惡一一審確則國泰之有
 無虛實心跡豈不洞然胡為勇于私揭怯于公言明告眾
 人暗欺皇上而人遂不能無疑於國泰矣且人之疑國泰
 不自今日始也陛下試問國泰三王之議何由起聞範之

忠義

三

序何由進妖書之毒何由搆此基禍之疑也孟養浩等何
 由杖戴士衡等何由戍王德完等何由銅此挑激之疑也
 南宗順刑餘也而陰募死士千人謂何順義王外寇也而
 各宮門守以重兵謂何王曰乾逆徒也而疏中先有龐保
 劉成名姓謂何此不軌之疑也皇上又問國泰如林之旅
 環衛洛陽而青宮之掃除誰為滅汰二萬之腴跨連三省
 而攻圍之贍地誰為阻撓離峻之宮增及萬厦而淑靈之
 坏土誰為寢閣此偏注之疑也有此積疑至今日忽有張
 差一事正與往者舉措相符安得令人不疑且今日之疑
 國泰又非張差一事已也恐騎虎難下駭鹿走險一擊不
 效別有陰謀陛下不為急護東宮則東宮為孤注萬一東宮
 失護則陛下為孤注如之何不令人畏且疑也國泰欲釋
 人之疑惟明告貴妃力求陛下速執保成下吏如果國泰
 主謀是乾坤之大逆九廟之罪人非但貴妃不能庇即陛
 下亦不能庇也借劍上方請自臣始或別有主謀無與國
 泰事請令國泰自今以後凡皇太子皇長孫起居悉屬國
 泰保護稍有疏虞罪即坐之則臣與在廷諸臣亦願陛下
 保全國泰無替恩禮若國泰畏有連引一味熒惑聖聽久
 稽廷訊或潛散黨與使之遠逃或陰斃張差以冀滅口則
 此獄將終不結耶臣非不知齒馬為嫌器鼠宜忌因連日

呼天不應諸臣無不恨國泰從中作祟而未有明發之者
 臣恐愈久愈激愈激愈危或致復生他變用是昧死披瀝
 庶幾此獄早結一日國本早安一日為東宮即所以為皇
 上東宮安則皇上亦安為國泰者亦宜以臣言為忠告也
 伏惟聖
 明裁察

吳中行字子道性之子武進籍宜興人甫冠舉鄉試隆慶
 五年成進士授編修大學士張居正中行座主也遭父喪
 奪情視事御史曾士楚吏科都給事中陳三謨倡疏奏留
 舉朝和之中行獨憤適彗出西南長竟天詔百官修省中
 行乃首上疏劾居正明日趙用賢疏入又明日艾穆沈思
 孝疏入居正怒欲廷杖之翰林院侍講趙志皋張位等具
 疏救格不入學士王錫爵會詞臣數十人求解於居正弗

納遂杖中行等四人明日進士鄒元標疏入亦廷杖五人者直聲震天下中行受杖畢氣息已絕中書舍人秦柱挾醫至投藥一匕乃蘇輿疾南歸居正死廷臣交薦中行召復故官進右中允直經筵大學士許國攻李植江東之詆中行用賢為其黨中行奏辨因乞罷章四上詔賜白金文綺馳傳歸言者屢薦執政抑不召久之起侍講學士掌南京翰林院同里僉事徐常吉嘗訟中行事已解給事中王嘉謨復摭舊事劾之命家居俟召尋卒後贈禮部右侍郎

著有賜餘堂集十四卷

本明史 疏略曰元輔張居正乞歸守制至再至三而皇上眷倚則殷慰勉特至維皇上之意豈不責之以義而欲其通之以權哉然而舉也萬古之綱常所繫四方之觀聽攸關居

正父子異地分睽音容不接者十有九年一日長棄數千里外陛下不使匍匐星奔憑棺一動必欲其違心抑情街哀茹痛於廟堂之上而責以訐謨遠猷調元熙載豈情也哉元輔之為賢輔弼也其對揚之言惟曰聖賢義理祖宗法度兢兢守之勿之有墜焉耳宰予欲短喪子曰予有三年之愛於其父母乎王子請數月之喪孟子曰雖加一日愈於已聖賢之訓何如也在律雖編氓小吏匿喪有禁惟武人得墨衰從事非所以處輔弼也即云起復有往例亦未有一日不出國門而遽起視事者祖宗之制何如也乃內閣二輔臣首題之疏方以計聞遂以例請而臺省諸諫官乞留之疏尤昧成憲抑又謬矣皇上所以勉留之者為社稷為生靈也臣則謂皇上誠虛懷親賢講學圖理日召見大臣益明習國家事不以嗜欲漸開而懈心生不以疆圍僅甯而侈心將見聖德日盛世道時雍子孝臣忠彞倫攸敘則風化行天意順或亦弭災銷變之道也臣之進也元輔之所舉也苟有干慮一得之愚所當吐露而復以全軀保妻子之念奪之非事君不欺之忠亦非事師無隱昭是非垂勸戒史臣之職也與其記述於簡冊以彰曠然懲孰若披陳于君父之前求今日無過舉俾後世無遺議

忠義

三

也哉

路邁字子就少與弟遴讀書期不負忠孝崇禎七年成進士授暨陽知縣以卓異擢儀曹旋遷銓曹員外郎冢宰鄭三俊知其清慎委掌大計邁曰掌計重任也亦羶局也有不慎則狼藉必甚吾二親春秋高盍歸養以避之乎遂告歸鄭公留之不得家居賦詩自娛值鼎革以事連逮入獄屢經部鞫

世祖皇帝鑒其忠特原之放歸卒於家著有明心錄夢餘

詩草

參節舊志

徐槐義勇首領素有膽力嘉靖乙卯倭寇奔逸突擾縣境

槐時年七十堅請追逐遇於蔣山適捕官馬路槐以己馬與之抗力步戰殺傷倭數人倭怒鷹至從兵皆散走槐刀

折急取所佩流星鎚而縲結難解竟為所殺

本舊志

張邦紘萬曆間由武進士授南京神機營守備遷揚州游

擊陞四川松潘參將帶副總兵銜征苗死于難崇禎己巳

贈官諭祭蔭一子永禎任兩廣參將

本徐志

王行儉字質行崇禎十年進士歷官刑部員外郎庚辰出知重慶府廉平有惠政辛巳流賊張獻忠陷夔州重慶遂宿重兵行儉撫馭有方兵民咸獲安業直指某貪而鷺爪牙數十人橫虐行儉擒其二置諸獄司李懼行儉曰吾豈

累公哉即日委印去兵民大譁直指懼使巡守道更相慰
藉然後還時四川巡撫陳士奇駐兵重慶遣參將曾英趙
榮貴擊賊皆為獻忠所敗甲申六月十七日賊抵城下擊
以滾礮賊死無數二十日夜黑雲四布賊穴地攻城城陷
率兵巷戰救援不至行儉與士奇及知縣王錫俱被執賊
強行儉跪不應以鐵針針其頭剖其肉縷縷至盡終默若
禪定者士奇與錫罵賊死巴人立三忠祠祀之

國朝乾隆四十一年

賜諡忠烈

參節明史陳士奇傳
勝朝殉節諸臣錄

莫可及字君愚由監生授長沙府照磨崇禎十六年護甯
鄉縣印流賊張獻忠陷城死之二子若鼎若鉅號慟奔赴

并遇害

國朝乾隆四十一年

賜諡節愍

若鼎從記
參勝朝殉節諸臣錄

孫謀崇禎七年進士以戶部員外郎管天津屯田流賊至

謀度不能免先期仰藥死

參徐志
選舉錄

吳炳字可先萬歷四十七年進士選授蒲圻令多善政行
取得刑部時魏瑞屢起大獄炳謹守繩法不敢有所徇改
工部值三殿工興能恤工匠之困歷官員外郎乙丑轉福
州知府時閩海劉香老為寇撫軍熊文昂兵敗舟焚欲沒
洋賈金以償費屬炳文致其獄炳曰殺人媚人吾不忍也
閩省有陳晃者以夤緣中式事覺囑庫使曾士高饋金千

兩炳卻而不受尋以病免歸甲戌大司馬陸完學薦起為
 留都戶部一清宿弊崇禎辛巳改提學副使敦實學勵行
 誼諸生競勸鼎革後流寓廣東永明王擢為兵部右侍郎
 從至桂林以本官兼東閣大學士仍掌部事從至武岡聞
 大清兵將至從王倉猝奔靖州被獲脅之降不屈拘于衡
 陽縣湘山寺不食七日卒絕命時以詩授僕寄其家有荒
 山誰與收枯骨明月長留照短纓之句炳生而文秀天賦
 逸才所著有說易一卷樂府五種及絕命詩一百首行於
 世

國朝乾隆四十一年

賜諡忠節

參節明史及勝朝殉節諸臣錄

陳貞達字則兼左都御史于廷子以父蔭授應天府通判
 崇禎己卯補戶部主事時遣中官分理部務公卿無不承
 望風旨貞達獨不為之下璫銜之以事下詔獄在獄中與
 黃閣部道周情好最密每酒酣閣部輒指寢室曰此吾兩
 人山陽壚畔也久之得釋左遷順天府知事甲申三月流
 賊陷燕都被執暝目罵賊賊怒以刀斫之流血赭體罵愈
 甚桎兩足投馬櫪中漬以馬矢罵猶不絕三日而死有京
 營裨將陳錦衣收葬都城外裨將死遂無復識其墓者
 國朝乾隆四十一年 賜諡節愍 參徐志及勝朝殉節諸臣錄
 吳登俊字民章崇禎十年武進士官錦衣衛千戶十七年

李自成陷京師力戰死其族人遴字維章監生同盧象觀起兵死於邑高橋

盧象觀字幼哲兵部尙書象昇弟崇禎壬午鄉薦第一連雋成進士爲兄請祭葬羈長安選授金谿令未任而北都變宏光立授中書舍人順治二年六月南都變象觀聞道抵家

大兵將至宜興象觀集邑中士大夫於明倫堂懸明太祖成祖二象哭之觀者皆泣因謀起義兵是時福王未知所在唐王在福州魯王在紹興潞王在杭州將謁潞王至則已迎降矣象觀大失望道遇陳坦公坦公者名安江西人

頽目偉軀有勇力善用大刀嘗爲諸暨守備失諸將意去之杭州浮沈酒肆中象觀招與飲語天下事泣數行下安慨然曰吾閩人多未有慷慨如公者吾今乃以身許公矣遂與俱歸象觀與議曰北兵已南驅誠于丹陽廣德間要其歸路宋建炎事可見也募兵數百人盡散家財給軍食洪承疇移書招撫餌以富貴三至三拒之于是宜興號義兵者往往屯聚與象觀旌旗相望

大兵至營于北門諸義兵各連小舟居東西兩泖中謀以火攻六月二十五日約夜中火起則俱發會

大兵南哨悞蕪草房鄉兵望見皆應之

大兵聞鼓譟聲益縱火張勢本約火攻者義兵也而三面之火反皆起自

大兵鄉兵遂亂象觀進薄其營中流矢自頤貫耳落二齒創甚乃退陳安殿矢集甲冑錚然有聲追騎近回叱之人馬辟易手曳道旁水櫃當馬足象觀始得脫退兵張渚堅守月餘丹陽孝廉葛麟浙人徐闇如至軍聲復振象觀創亦愈結柵新橋又數日毛得五至得五金陵人與弟在廣德溧陽山中聚眾二百餘人來歸皆雍髮象觀頗疑之得五初聞盧兵盛謂可倚以立功既至不如所聞又見疑會大兵駐戴埠張渚大震得五請以屬赴至嶠山埋礮于地

及戰射殺數十人會天雨礮不得發得五力戰死無何大兵水陸並至陳安率數十人守新橋大戰移時殺數騎水兵以鳥銃旁注安中股猶揮戈力戰斬首數百刀桶脫拔劍自刎于新橋其屍越日不仆人無敢撼之者象觀既敗聞通城王在長興乃與從兄象同及葛麟等往從之十月兵敗于小谿象觀戰死與偕行數十人無一還者

國朝乾隆年間 賜象觀諡忠節象同祀忠義祠

臣錄 湯思孝明季四忠敘性歸忠孝一時見天地之心道立綱常萬古壯河山之氣是猶石火蘊光乍遇擊而忽起轟雷空震不依形而自神國運于此徂衰名教因之再轟斗野之星樞襟浸巨區撼勾吳之地軸是以挹菁英于雲宿固多懷才抱德之儔抑且秉剛德于川巖不乏取義

舍生之士列諸竹簡代誌傳人載在珉碑廟垂遺跡憤膺
西焚之鋒臣哉有處血洒南荒之禍帝曰咨雲毘陵郡內
姚豈首矢丹心博浪城中興祖曾摧黑鞋他若簿吳尉莫
咸足頡軫頽感其風則弱水瀾迴凜其色而霜華冰立
斯誠振頽骨以文柔笑刀舌劍偏能戰勝于朝廷耳滅首
態隨時媚骨以爵祿紫綬紆袍惟巾則幘黃金橫帶有袴
濡僅識捐軀于爵祿紫綬紆袍惟巾則幘黃金橫帶有袴
皆紈非此邦之獨然亦率上其盡爾於戲荃佩端須流柱
蘆花夜老薇歌過響漫哀槐葉秋零砥此狂波端須流柱
苟非勵臣貞于奕世何以昭大義于人閒乃者雷雨初屯
前明未造兵稱赤子烽火遍達乎甘泉符屬真人王氣潛
侈于綠海一人握上方而睥睨羣工奉簡命以傍徨時則
有若大司馬督師盧公象昇儒生報國文士從戎躍馬沔
南入試盤根之利揮戈冀北更期厦木之支君恩方沃于
平臺紫駟過錫親夢遽違于歸幕白雁遙飛禮援金革尺
尺嚴哉詔起上苦方寸亂矣究以勳高逢妒道直難容在
公心自竭其精忠何敢要盟于息壤而天意欲付以節義
幾同冤議于風波九閩聖主眷重當年萬里孤臣身輕此
日呼庚而四拜衝堅咽雪之魂逾壯免甲而單戈死陣裏
麻之魄猶生豈惟勇不可能允矣仁為己任逮夫鬣墮烏

號之弓鼎湖慘且衢滿黃金之職馳棘傷心遠遁微踪已
勝類稽之恥飄零碎影孰懷保障之思時則有若重慶府
太守王公行儉釋褐登車分符典郡國難失援眺舊都而
勳哭城亡必殉撫孤嫠以悲歌桃溪縹緲遣子全宗玉壘
浮沈畱身待賊陣雲合而戰深荼苦騎鐵繞而蹈刃節甘
夫是時北已革元年名將誰錄且此日南方襲位榮可倖梯
而乃志在喪元計不旋踵實痛天日南內廷尚不為劍
閣蹕臨之策况我愚臣責堅外屏忍浪作江州頭斷之言
是以膝如木植鬼更厲于剡睚肌裂髮絲虐有餘于封臬
莫謂片時之激應推百鍊之剛至如前督學副使吳公炳
者瑤林秀葉滋萎萃于繁霜錦水文毛翔翮音于陰雨崎
嶇百粵之鄉彼固各為其主奔走三危之境止求不負此
心恍孤吟于郵壁冷伴寒鴉儼勸講于舟中淚沾朝袖巫
烟黯淡夢隨望帝以長征衡嶺參差身作湘纍而未覺既
罹殃于盲豎復受誑于狡童昇仁瞻于淮城病歸已暝餓
疊山於燕土後死彌艱養以和而自粹不矜風雲變色之
奇神獨靜而返虛尚畱明月短纓之句又如前進士中書
舍人盧公象觀者總師介弟紹未泯之芳徽題柱書生端
始途之雅操倘列裸京之儔尚無嫌于膚敏甘居遜國之
侶偏自昧于菀枯瑀戈恨弱于魯陽攻石歎湮于媧女襲

忠義

三

宵營而熱火妄伸螳臂之雄流飛鏃以驚弦早鍛鴻臚之羽固料數千鳥合之必斃而重民彝者敢惜民軀亦知上九龍亢之已窮而守天道者甯違天步魂招晶闕淚湧石尤之濤骨葬螭山哀填精衛之木雖輕俠而奮身疑于小諒當處家而靖國實稟愚忠嗟乎茲四臣者咸克疾風露勁嚴雪挺堅矯迹寰區抗情霄漢豈非方駕文山薨徽孤竹寒銕炯宿環幹凌嵩者乎或謂朱瑟音閑乃聖賢之淑度金石調激豈盛世之休模曷忍好語淪胥過相誇耀且匹夫亦能自勉君子必取博觀舉近舍遠錄貴略微概此數端良皆謬戾宜詳斯語抑又匪然蓋吾道之傳也不藉辭說而藉良知苟良知既泯無容藉口中行國維之固也匪由形氣而由生氣使生氣常伸端賴敦崇志節故余闕祀而一統歸則功在明倫隱干城于戲亂圖艱之外孝孺出而儒風振則學期見性時奇烈於大中至正之間此死守蒲州特錫歲寒之詔拜辭柴市猶存和淚之詩況邇日應制之詞臣各命表忠于明代幸與朝忌諱之不設何故國幽微之弗彰是當年成此名者詎為沽名而今日傳其事者原非好事凡以惟天理之極要示人心之本然俾識偷生徇欲乃真無定之巖牆應思盡道歸全不在有形之正寢故不必言賈莊遇陷騎卒從亡巴蜀臨危屬僚共義

荆水亦多同難漢江尚有遺忠而即此一地四臣後先齊軌從容慷慨各吐血誠已足係既往之雷連備將來之風厲而令觀者懷感感者懷奮也至于廉來之負嶠弗若商容之就列綽佗之駢鬪弗若晏嬰之質盟則以死恩死暱亦為溝壑之流究之急父急君原吾頂踵之事斯又拔清原本研晰幾微貴能慎始以全終非可執彼而議此余也衡門素士屢圃通農問悠悠之世黑白隨時吟浩浩之歌丹青弔古矧儀型其在邇懼風雅之未揚爰殫樸思尚賡

馨烈

吳貞毓字元聲崇禎十六年進士甲申國變宏光立授戶部主事丙戌八月桂王立端州十一月貞毓赴行在授吏部主事歷陞太常卿戊子五月同商邱伯侯信奉敕往封李成棟惠國公宣諭恩信開陳大義成棟恭聽受命遂出師江右王嘉其功拜戶部尚書逆臣孫可望本以流賊就

撫庚寅據貴州自稱秦王脅朝廷與勅封貞毓與大學士
嚴起恆持不許可望殺起恆貞毓以奉使獲免及還進東
閣大學士順治壬辰

大兵南征移蹕貴州二月至安隆可望改爲安龍府迎王
居之宮室庠廡服御粗惡守護將悖逆無人臣禮可望謀
禪代惡貞毓不附已令其黨冷孟鉅吳象元等交章彈擊
以朝事盡委奄人龐天壽武臣馬吉翔設內閣九卿科道
官改印文爲入壘盡易其舊立太廟定朝儀擬改國號曰
後明日夕謀篡位王聞憂懼密謂中官張福祿全爲國欲
下密敕令晉王李定國入衛二人言徐極林青陽張鐫蔡

續胡士瑞曾疏劾吉翔天壽宜可與謀王卽令引以告貞
毓貞毓曰主上憂危正我輩報國之秋諸君中誰能充此
使者青陽請行乃令佯乞假歸葬於歲盡閒道馳至定國
所定國接敕感泣許迎王甲午正月吉翔以差在廣西偵
知其事密與天壽私報可望且謂事由貞毓而與謀者有
勳戚鄭允元大理卿楊鍾等十八人可望遣其黨鄭國至
安龍威劫王令嚴罪諸臣因以兵逼貞毓就刑上不能救
流涕而已貞毓嘆曰吾盡忠謀國今逼于奸逆以死報國
臣之職也望闕再拜賦詩曰九世承恩愧未酬憂時惆悵
發良謀躬逢多難惟依漢夢繞高堂亦報劉忠孝兩窮嗟

百折匡扶有願賴同儔擊奸未遂身先死一片丹心不肯
休賦畢遂自盡時順治乙未三月也居二載定國竟奉前
敕護王入雲南乃贈貞毓少師兼太子太師中極殿大學
士謚文忠蔭一子錦衣世千戶餘贈卹有差建廟馬場勒
碑大書十八先生成仁處以旌其忠

國朝乾隆四十一年

賜諡忠節

參節明史及勝朝殉節諸臣錄

潘承祚字用卿崇禎十六年由貢生任吳江訓導福王初
立擢左春坊司直郎承祚以老辭畱原職順治二年
大兵南下吳江人吳易倡城守之議推承祚領縣事數日

城陷被殺

節楊懷遠鄉評備考參吳江縣志

曹師稷字銘石景陽孫萬曆四十四年進士由中書擢刑
科給事中時值逆閹煽虐後憫東林諸公以忠授命特劾
溫體仁錢謙益黨錮辨枉縱振淹滯前後十餘疏蹇蹇諤
諤有古直臣風旋奉命封荆藩卒于道著有刑垣疏草
盧國雲字公祥國焄字仲業國絃字君廓皆象觀從父順
治二年七月戰死於張渚之新橋象坤爲象觀從弟戰死
於長興

吳敞瑩字漢瑋府庠生與族兄廷縉廷柱輩從盧象觀起
兵後兵敗敞瑩廷柱死於邑南門外廷縉輩復從象觀至
長興俱戰死於合溪

潘敏成字克勤邑之山亭鄉人明末舉武勇團結諸村落鄉勇捍禦盜賊邑西南數十里賴以安後從盧象觀於茗嶺請試其技即斫竹長二丈許銳其末擊刺如飛象觀兵敗敏成戰死於寺基墩其族弟廷璜字君俞

大兵將至時家人勸之避不聽被殺參節潘氏家乘

張琳字純璧邑之牧馬口農人生有膂力聞盧象觀倡起義兵率鄉勇數百人至西門接戰轉至南門琳先登持鎗刺傷一騎將

大兵環射之退入一大宅升屋烈焰起琳躍入稻田徧體箭孔如蝟鬚髮盡燬數日死其友陸志殮之志邑諸生字

斌侯崇禎元年應募勤王至京口聞解嚴返至是去之閩粵後歸棄諸生以隱居終節許重炎璞堂文鈔參陸志澹庵筆記

張緒吉字吉人邑庠生與督師盧象昇為姻戚象昇討賊豫楚聞緒吉以監紀秩從行後從象觀起義兵敗於張渚之新橋死之時許樹遠字硯銘亦象觀戚友戰於新橋中

矢死參節鄉評備考

陳寅字寅公府庠生同盧象觀起兵戰死任源祥贈陳迪公詩註云迪公兄寅公死於兵子弟實有同痛

任源邃字涵生順治三年從呂氏於青山柵拒大兵方酣戰而呂氏遁源邃被執至溧陽當事者命之跪

源邃曠目曰若獨非故明臣乎我恨不殺汝何跪為乃斷

頭而死

參節侯方域壯悔堂文集

周源儒從金聲於兵戰死於太平

本錢人麟請增祀忠義狀

吳起龍字渥麟崇禎六年武舉順治三年南京已降起龍

糾集義勇從楚宗室於長興搏戰小滑敗績聞唐王立奔

閩明年正月至衢州遇督師黃鳴俊畱起龍守衢起龍復

開化又奏捷於遂安拜御營總兵官掛印都督同知復捷

於威嶺復常山玉山皆以少敵眾未嘗衄後浙閩俱失乃

退保懷玉山十二月與

大兵戰於德興之十三都相持二月糧盡援絕遂死之塵

下土方某詣永明王上狀贈正總兵官左都督蔭一子錦

衣衛百戶賜祭葬然時當危亡僅虛典而已

參鄉評備考

潘喆字哲先庠生與邵履正俱為堵允錫參謀順治六年

大兵陷永興二人被執不屈死事聞贈喆禮部主事履正

戶部主事

參節鄉評備考

許啟洪字任宇天啟四年舉人官欽州知州以堵允錫薦

累官副都御史巡撫廣西寇至城陷守節不屈死

節瞿笠洲文集

李順字廷實明末因族孫用楫官瓊州偕入廣仕永明王

由貢士歷官監察御史時王在安龍受制於孫可望大學

士吳貞毓等謀救李定國入衛順與焉事洩同被害用楫

重刊宜興縣志 卷八
弟來字我貽由選貢起家歷官監軍道順治十一年七月
殉難於德慶州

李用楫字若濟崇禎十六年進士授瓊州推官甫莅任廉
知有劉醫生倚前任某勢橫行鄉曲杖逐境外士民稱快
廣東多黎蠻教官翁某署瓊山以貪酷激變被劫殺當事
議討之用楫以爲宜撫當事卽命用楫往洞口諭以禍福
止坐爲首一二人黎蠻感泣勒碑洞口後有軍役無不樂
從調肇慶行取擢御史進太常少卿出聘安南尋主兩廣
鄉試稱得人時

大兵已破梅嶺國勢日蹙會肇高廉雷羅瓊巡撫李明忠
卒大學士吳貞毓薦用楫代之遂擢兵部侍郎巡撫五府
一州時順治八年也用楫度時勢難支買宅西甯居其父
母妻子孑身赴任九年春耿兵來侵戰于合浦青頭營數
日勝負未決總兵萬良告敵以虛實引之夜劫營師遂潰用
楫僅以身免至靈山舍門生勞貞觀家曰事無可爲當一
死報國耳是夜肅衣冠沈于勞氏園池貞觀具棺以殮十
二年其父偕家人歸宜興康熙六年次子焞閒關入廣始
扶櫬歸葬節盧文弼常州府志稿參鄉評備考
盧象晉字錫侯象昇弟象昇死之明年象晉伏闕請死邊
事曰臣不才願効闔門之節帝以爲妄不用國變後奉母

重刊東坡先生集卷八
李匿深山不出久之有何姓者與其族某訟辭連象晉謂
之曰急薙髮毋相累不聽太守驗視其頂髮偏寡謂已薙
復生象晉厲聲曰未也守怪之趣薙髮曰我先朝遺老兄
弟俱死國吾頭可斷吾髮不可薙守怒榜掠之獄成當大
辟其時同邑庠生李則行李文注李從厚輩皆以不薙髮
死巡撫土國寶以忠烈之弟欲全之乃緩其死逮捕宗族
象晉不爲動守以書脅其母曰不薙髮罪且及母母詣獄
持之泣守猝入縛象晉爲薙髮而釋之象晉大號既出獄
辭母投佛寺並髡其頂人稱之曰盧三和尚自是間一歸
省母及卒視含殮會葬畢卽棄家出遊其子勸徧求之歲

僅得一再見一日返宜興從子以尙止之象晉曰我將死
矣示之葬處自題碣曰委骸磯且戒曰慎毋棺盛以缶遂
卒著有處士遺書一卷

節胡宗緒文集

盧象禎督師盧象昇從弟崇禎六年天罡賊犯張渚市人
恐急閉柵象禎獨冒刃直前與賊鬪於柵外賊鋒刃蝟集
象禎頭已落其身尙能躍入柵內挺立不仆賊驚潰人稱
爲喪元勇士年二十有三葬犢山之麓卽以市人所稱者
顏其碑云

步匡明崇禎末爲徐闇如偏將聞盧象觀起義與軍校張
利千率眾從闇如助戰時有唐魁徐夢岳蔣曦陸元望儲

振彩蔣章甫李明之康三省蔣七陸二同戰死新橋又有

王自榮吳乾思王承昌袁魁顧文錢順俱戰死小湑朱興

公錢在茲戰敗被執勸之降不屈死之

參武進錢人麟請增祀宜邑忠義狀

儲京祚郡增生崇禎甲申三月間變儒衣冠束帶號泣赴

水死

何捷字忠甫鍾溪里人明崇禎間拔貢初任浙江安吉州

州同調江山縣丞轉福建延平府順昌縣知縣甲申城陷

死節其兄何掖次子何百祿姪何清何漢何長齡同日殉

難

萬濯字行遠少穎慧有志操萬曆四十六年舉人由學博

擢戶部主事崇禎十五年命監淮安倉務陞本部郎中值

甲申之變在淮安官署聞之號泣累日嘔血數升既聞北

都殉難諸臣援筆作二十二君子贊瞋目視其子曰幸從

諸君子地下遊矣卒年五十一著有意園集

堵正明字寅叔大學士允錫姪自幼即工騎射有勇略十

五歲補諸生乙酉五月南都失守從盧中書象觀起義象

觀死乃取道山閒達楚營允錫命督君子十營每戰沖冒

矢石累立功官錦衣衛指揮都督府右都督己丑四月駐

兵永興

大兵從閒道突至正明麾兵死戰身被重創格殺數將而

死年二十四事聞贈太子太保
堵世明字驥良大學士允錫子乙酉六月從盧象觀起義
敗績乃辭母陳夫人適楚以恩授監察御史永興城陷眷
屬闔門自焚世明同父脫龍虎關之難允錫將入朝先遣
世明齎表自陳行至陽山暴疾卒

吳其靄字清間少工文以乙酉拔貢入閩授兵科給事中
陞御史中丞督撫兩粵絲柳之悟遂入肇慶是時從李成
棟至者曹奕耿獻忠輩氣凌朝士袁彭年劉湘客丁時魁
蒙正發金堡朝中目為五虎內主李成棟子元允勢張甚
其靄正色立朝助堵允錫吳貞毓力觝諸人及五虎偕成

棟父子俱敗而南甯廣南安龍遂潰其靄憤恨卒於廣西
柳州洛容縣閩人特祠肖像祀之陳維崧悼之以詩云傳
聞陽羨吳文學老作天南响町侯今日頭銜書不得點蒼
遺骨倩誰收後二十餘年戊申始得歸葬宜興著有清間

詩集

參吳譜

毛重泰字睿思崇禎末由文庠生考將材歷官狼山總兵
順治二年

大兵破揚州重泰以舟師至京口力戰死或云被兵太湖

死

參萬構筆記

國朝

任宏嘉字葵尊康熙十五年進士由行人擢御史疏請裁無益廳員省官民擾害又疏言周程五子宜陞次十哲州縣宜有講堂書院又言學政爲人才所始國學乃首善之區尤宜嚴飭又極言今學道不特受制有司并受制知府蓋道府之階級不甚懸旣無以資彈壓部郎之聲望不甚重又無從達封章况循資序選未掣簽請屬盈廷旣抵任阻撓百出求其公明萬不可得乞重其選通列

欽點疏上都御史參宏嘉挾私更制乞勅部察議

上曰邇言官條奏少抒所見可免察議先行飭學臣定監視二條餘知道明年巡北城奏言盜風未靖由保甲不行

稽察不清由旗人雜處司坊不潔由勸懲不當又奏言州縣昏夜比較鄉民托宿無地饑寒受杖往往殞命又言朝廷清丈原以爲民而藩府駁冊上下動費百金津梁有關原以禦暴而今小港皆設巡爛旱路亦行堵截檢索至負擔稅課徧雞豚語多深痛明年掌山東道兼江南道上十漸疏一曰朋黨結交之漸始因交際爲餽遺漸以愛憎成水火二曰奢侈僭踰之漸飲食若江河之下廝役襲組纂之華物力旣虧等威亦紊三曰文武訐訕之漸督撫提鎮挾私互訐小吏效尤奸民益甚四曰紳衿吹求之漸有司視紳衿如仇讐奸民以紳衿爲魚肉五曰上下奉違之

重刊宜興縣志 卷八 忠義
漸 國家良法美意奉行徒有虛文過當反成弊政六曰名器
混淆之漸夫爲生養萬民計必重生養之人守令宜用正
途異途但授佐貳七曰常平侵漁之漸貯穀久易混濶多
難盤查總歸侵蝕不若聽民輸錢數易稽而無朽蠹八曰
河工興建之漸從古無不徒之河治道惟去其太甚不必
議開議塞借一勞永逸之詞爲逐利倖功之術九曰情罪
過當之漸如逃人止于鞭刺過宿反至竄流輕重不符枉
誣尤甚十曰積習膠固之漸陞遷有趕缺壓缺處分則忽
重忽輕營競日甚又特奏銓政不平舉人揀選邊地一科

內地乃至五科各官月選並兼雙單主事獨歸單月至捐
納之有改注原近日之權宜而假急公爲居奇一石售爲
數石一人改作數人名器褻越莫甚于斯皆得
旨議行旋擢奉天府丞轉通政司參議三十九年丁母憂
歸服闋以病目告卒于家
補遺 言曰用之則賦詩答引言非是宜坐監阿之
馬伸字時中先世自金陵徙居宜興父衷爲鄆州宿城尉
卒于官伸以東平籍中紹聖四年進士爲鄆縣丞成都守
委伸受納冬米盡革宿弊民無留滯薦西京司法時范致
虛攻程頤爲邪說門下多叛去伸銳然執贄求見十反愈

恭卒受中庸以歸靖康初爲御史汴京陷金人立張邦昌
伸率同院具書請邦昌迎康王邦昌得書氣沮始議迎元
祐后垂簾聽政高宗卽位擢殿中侍御史撫諭荆湖廣南
還奏汪伯彥黃潛善不法十七事疏入留中改衛尉少卿
疊上章謂臣言可用乞卽施行若臣言非是宜坐誣罔之
罪移疾待命旬日責監濮州酒稅卽襪被行死于道或云
汪黃密害之也先是金人議立邦昌集百官以兵環脅伸
言于稠人曰吾曹職爲爭臣豈可緘默約中丞秦檜共爲
議狀乞存趙氏復嗣君檜不答伸屬稿呼臺吏連名書之
檜爲臺長不得已書名伸遣人疾馳以達金明年汪黃始

以誤國竄殛復召伸而秦檜還自金以存趙議揚言己功
取富貴伸之子孫漂泊閩中有甥何琬者得其原稿上之
檜大怒竄琬嶺外檜死其家訟寃始復還會胡安國上時
政論乞追獎伸錄其子孫乃贈伸諫議大夫伸幼子惟功
歸居宜興之澳瀆里越十餘年檜既死上諗存趙議錄惟
功爲國學生

[Faint bleed-through text from the reverse side of the page, including characters like 補遺, 宋, 黃肇, 建路, 許浩, 黃天, 宋亡, 鑒對, 心不, 元]

補遺

宋

黃肇中字允執嘉祐六年進士由曲阜縣知縣屢遷至福

建路廉訪使捕治奸猾為奸人雍京毒死

許浩靖康二年三月從二帝北狩嘔血死於道

黃天鑒咸淳中鄉貢仕至禮部主事書舍人告養歸值

宋亡不出至元庚寅以憲使錢經等薦遣使賫牒召用天

鑒對使詆斥甚力并裂其牒因被逮論死臨刑口占云鐵

心不可移貞骨何所頗夙志在捐生今方知有我

元

忠義補遺

周紹先字繩武晉平西將軍處後元至正庚寅紅巾賊寇宜興發平西墓紹先糾集宗族復仇殺賊數百已而賊麋集圍合紹先戰死族人從死者數百人

邵全節祝陵人元季盜賊蜂起全節傾資結客以保障鄉閭人賴以安旋有巨寇倡亂全節率眾禦之兵敗被執不屈死

吳江芳莊里人至正十二年九月賊陷溧陽州江團結鄉兵與溧陽史敬武王全禮犄角相應十月賊去之東南鄉江等率兵入守既而賊又至城再陷江與其從弟清皆戰死大清觀前族人隨死凡數百人

明

儲楫洪武中守備以邊警陣亡

儲由履字正道貢生雲南御史入蜀禦寇卒於陣

徐申懋字元芳天啟壬戌進士官工部主事以忤逆閹魏忠賢謫降浙江布政司理問尋遷分水知縣忠賢伏誅擢向所擯斥者申懋得復原官後以京察一等陞郎中授四川成都知府拜命之日止帶家丁二人尅日起程旅邸聞燕京破申懋慟哭投繯家人力救不死歸抑鬱而卒

儲起潛字楚白崇禎選貢監軍同知值流氛劇甚提兵往勦陣亡

陳琅字子良厚和里人與族兄所長同遊督師史可法幕可法以琅爲諮議參軍揚州城破琅自刎死所長以馬革裹其尸歸後數年卒

吳允禔字先庚太學生尙書儼元孫也順治乙酉閏六月大兵至宜興族眾避兵四散允禔獨古衣冠守宗祠不屈死

黃鍾斗字指越明季由太學生入資爲內閣中書升兵部主事南都破不屈死

蔣永儒字成之少嫻騎射順治乙酉七月中書盧象觀起兵張渚聘爲先鋒與丁丕選字用之俱死於邑之北門諸

生周濂儒字伯載與同邑把總陳有瑞死長興之小涓儲謙字受之儲懋捷字聖期死十畝墩下諸生朱邦彥字士美中流矢死何鏞鏞子天龍死於陣蔭生陳貞禧字壽先諸生吳國士字森于儲啟祚字振裘王德源字在旃蔣永儼字君望王孝源字舜其王祚榮字振鷺諸生俱不屈死丹陽葛敏葛鼓步守信劉應鳳俱從死

周世臣崇禎庚辰進士知漢川縣以建言革職補檢校擢興化府推官從閣臣黃道周學國變後士撫軍國寶聘之三世臣致書固謝有七不可之說頃之以蜚語株連論死黃守正字正元明季鄉勇順治乙酉

重刊宜興縣志 卷八
大兵至宜興守正率百餘人赴難身被七創其二子救免
之守正殘廢飲恨數年卒同時吳上軫與弟上軻亦以負
傷歸後數年卒

儲邦輔字蓋卿貢生爲文魁發泉湧撰北遊南歸紀程詩
忠國憫時之志暨兵農要畫胥形簡帙間後選松江府訓
導遷上海教諭城破自盡於明倫堂子封從死

杭彥清字玉瑜唐王時官福建興化欽依守備莅任三月
大兵下閩城破中三矢死

吳穀馘字克猷閩臣貞毓子桂王朝恩授錦衣衛指揮僉
事後隨王播遷緬甸緬人逼之遂死焉

杜忱字太初黃干里人明季土寇淫掠忱力戰死

吳永功字九敘諸生篤學勵行與同邑趙起濂舉五經會
順治十年以頑民被收死金陵獄起濂冒雪往負其骸以
歸友人陸斌侯吳弓武湯默齋備棺葬之與永功同時被
收者堵道楠字南枝萬象瑞字輯五皆諸生道楠死金陵
市象瑞遇赦歸起濂隱居教授終時人比之元儒許白雲
焉

國朝

徐懋威順治初由庠生入太學授福建順昌縣知縣丁亥
土寇作亂懋威於十一月十九日死於兵

吳鴻泰字友梅廣東兵巡道史燧妻弟燧聘鴻泰至廣旋遊廣州香山縣令幕中順治九年冬月寇攻香山城陷不屈死年三十三

薛君佚其名水師營軍尉勦捕湖寇舉炮擊殺數百人卒以眾寡不敵爲寇所害土人卽所架炮處收而葬之且爲立廟頗著靈異焉

陳納陸官瀆里人順治丁酉科武舉以防湖爲寇傷死孫燿字祥正康熙十二年爲福甯總兵官吳萬福客閩逆叛於福州以書招諸大帥燿力勸萬福斬其使發兵拒守而賊兵奄至燿及萬福皆死之舍人林麟焟有詩弔之云

誓師幕府勸移兵青史應傳慷慨名死節千秋比袁粲肯教人笑褚淵生

